

**AWIG - AWIG**  
**DÉSÁ PAKRAMAN TABOLA**



**DESA SIDÉMÉN**  
**KECAMATAN SIDÉMÉN**  
**KABUPATÉN KARANGASEM**

## RÉKA PRALAMBANG DÉSA PAKRAMAN TABOLA

Sasuduk ipun kadi ring sor puniki :

1. Sajroning wangun sané bunděr punikā, kantěn wéntěn tigang pantā, ring têngah, ring mađhya, ring pinggir. Punikā ñihayang sajroning Déśa Pakraman Tabola, ngamanggěhang pisan pidabdab tri maṇḍala, inggih punikā, utama mandala, Madhya mandala, minakadi nista mandala.
2. Kantěn Padma Hastawalā, punikā pañatūr pañirang , kangin kawuh, kalér, kělod, miwah pañirang sowing –sowang, mănūt kahyangan sane wěnten jroning Déśa Tabola, talěr hanūt ring pahiděr – hiděran.
3. Sajroning lawān padmané sowing – sowing, kantěn huwat ipun macanggih tigā, waluyā gni ngabar, praciri wětu cāhya nirmla saking dik dasa déśa, pinakā sasuluh utama pacing malaksana ngarajěgang tri hitā kārana.
4. Sajroning utama mandala, jumělěg Sanggar Agung Rong Tiga dahat mawibhawa, punikā wantah pinakā pingajěngin linggā ring Pura Pusěh Tabola, sané kasungsong kasungkěmin saking rihinin arihin, talěr punikā ñihnayang pawangun Pura Pusěhě dahat lawas, yan hěrěpang ring kawéntėnan Padma Tiga sané pinakā linggā ring Panataran Agung Baśakih.
5. Kantěn rěka Swasthikā, pinakā pahiděr – hiděran sané tan nahěn marāryyan, maka cihnā Pura Pusěh Tabola, Agama Hindu puniki, hugi kantun ajěg salamin jagatė kanutn mahiděran nganutin butus usěhan ipun.

*Puput.*

## MŪRDDHA WAKYA

Pūrwwa pangastunkara tityang karma Déśa Tabola. ring buk pādan Ida Sanghyang Widhi masa sangkaning paraming dumadi. bhatarā - bhatarī sane malinggā ring Pura Pusēh Tabola. dawning malarapan saking krēttā warā nugrahan pāduka Bhatarā Samudhaya. kāryya puniki kasiddha puput.

Kaping kalih hatur angayubagyan tityang karma Déś Tabola. pingajěng ring Ida Padanda - padanda. ida sang rumaga pingajěng déśa. ida dane para panglingsir. Kliyang. Pamangku. minakadi ida dane sang maraga cěstakāra. widagdha prajñā wicaksāna sarěng sami. sané sampun sangkaning swēccha lédang sarěng mapawangun ngripta ugěr - ugěr marūpa awig -awig Déśa Pakraman Tabola puniki pacang kānggèn sěpat siku -siku sajroning déśa kantos ka hungkur wěkas.

Talěr majěng ring Pemerintah Daérah Kabupatén Karangasem. para manggala sané mastika ngiwang patutang awig - awig . tiyang ngaturang pangayu bagya. dawning sampun kasiddhan nurėksa maritětės saha mastikā. kantos marūpa puput.

Munggwing daging ipun mānūt Tri Hita Karanā. indik kahyangan gėnah ngadisthana Ida Sanghyang Parama Wiśesa. indik pawongan pinaka karma déśa. indik palėmahan minaka wawidhangan wawěngkon déśa. mabantang antuk lėkita. śāstrā-gama. śāsana. paswara. drėsta. minakadi sane sawosan. sané hanūt ring pamarggin dhamma agama kālih dharma nāgara. Dumadak kasiddhan mamangguhang kajagaddhitan sakala niskala.

PIDAGING AWIG-AWIG  
DĒŠA PAKRAMAN TABOLA

PAMAHBAH .....	i
PRATAMA SARGAH HARAN LAN WAWIDANGAN DESA .....	1
DWITYA SARGAH PAMIKUKUH LAN TETUJON .....	1
TRITYA SARGAH SUKERTA TATA PAKRAMAN .....	2
Palet 1.    Indik Krama .....	2
Palet 2.    Indik Prakangge Desa Tabola .....	6
Palet 3.    Indik Sangkĕpan Miwah Paruman utawi Pasamuhan.....	9
Palet 4.    Indik Kulkul .....	12
Palet 5.    Padruwĕyan Desa Tabola .....	13
CATHURTA SARGAH SUKRĒTA TATA PALĒMAHAN .....	15
Palet 1    Indik Tegal. Bangkĕt lan Karang .....	15
Palet 2    Indik Kakayonan .....	16
Palet 3    Indik Wawangunan .....	18
Palet 4    Indik Wawalungan .....	19
Palet 5    Sukĕrta Pamitĕgĕp .....	22
Ka ping 1    Pamidhandha miwah Dadosan Petĕdunan .....	22
Ka ping 2    Indik Bhaya .....	23
Ka ping 3    Indik Rarampagan .....	24
Ka ping 4    Paņanggra Baņjar. Dĕsa Sasabu. Sĕkĕhe Truna ....	25
PANCAMA SARGAH SUKRĒTA TATA AGAMA .....	26
Palet 1    Indik Kahyangan .....	26
Palet 2    Laluputan .....	28
Palet 3    Indik Dĕwa Yajņa .....	32
Palet 4    Indik Rĕsi Yajņa .....	38
Palet 5    Indik Pitra Yajņa .....	38
Palet 6    Manusa Yajņa .....	42
Palet 7    Indik Bhuta Yajņa .....	42
SAT SARGAH SUKERTA TATA PAWONGAN .....	44
Palet 1    Indik Rangkat .....	44
Palet 2    Indik Bĕlas Makurĕnan / űapiyan .....	45
Palet 3    Indik Balu .....	45
Palet 4    Indik Santana .....	46
Palet 5    Indik Wawarisan .....	46
SAPTAMA SARGAH WICARA LAN PAMIDHANDHA .....	47
Palet 1    Indik Wicara .....	47
Palet 2    Indik Pamidhanda .....	48
ASTAMA SARGAH NGUWAH – NGUWUHIN AWIG – AWIG .....	49
NAWAMA SARGAH PAMUPUT .....	50

**PRATAMA SARGAH  
HARAN LAN WAWIDANGAN DESA**

**Paos 1**

- (1) Désa puniki mawastā Désa Pakraman Tabola salantur ipun kinucap kalih Kasurātang sajro ning lēkita hamung " Désa Tabola "
- (2) Wawēngkon prabhumiyan Désa Tabola mawanēng nātur -désa mānūt sakadi Kinucap ring sor puniki :  
ha. Tēpisiring wētan : panēpin Désa Kēbung kāliah Désa Tēlengan .  
na. Tēpisiring kidul : panēpin Désa Sukahēt ;  
ca. Tēpisiring kulon : panēpin Désa Sangkan Gunung ;  
ra. Tēpisiring lor : panēpin Désa Isēh. lan Désa Sēlat ;
- (3) Sajro ning wawēngkon Désa Tabola wēntēn babañjaran sowang -sowang mawāsta Bañjar Paptusan .

**DWITYA SARGAH  
PIKUKUH LAN TATUJON**

**Paos 2**

Maka pikukuh Désa Tabola ngarajēgang mikukuhin kalih mitindihin pisan :

1. Pancasila pinaka Dasar Negara Republik Indonésia ;
2. Undang - Undang Dasar 1945 ;
3. Trihita Karana .

**Paos 3**

Désa Tabola ngamanggēhang patitis tatujon lwir ipun :

1. Ngutamayang tata-cara maagama Hindu.
2. Ngawangunang katrēptyan sajro ning Désa pakraman mangde kasiddhan rajēg katrēptyan prajā.
3. Ngawrēddhiyang kawicakṣanan minakadi kaprajñanan maka larapan gumawē gēmuh landuhing praja.
4. Ngawrēddhiyang padrēwya ning désa majalaran kawicakṣanan guna lakṣana mānūt dharma-prawrētti.
5. Ngarajēgang Dharmma-agam miwah Dharmma-nagara.

**PRATAMA SARGAH  
HARAN LAN WAWIDANGAN DESA**

**Paos 1**

- (1) Dĕsa puniki mawastā Dĕsa Pakraman Tabola. salantur ipun kinucap kalih Kasurātang sajro ning lĕkita . hamung " Dĕsa Tabola "
- (2) Wawĕngkon prabhumiyan Dĕsa Tabola. mawanĕng ñatur -dĕsa mĕnūt sakadi Kinucap ring sor puniki :
  - ha. Tĕpisiring wĕtan : panĕpin Dĕsa Kĕbung kĕlih Dĕsa Tĕlĕngan :
  - na. Tĕpisiring kidul : panĕpin Dĕsa Sukahĕt :
  - ca. Tĕpisiring kulon : panĕpin Dĕsa Sangkan Gunung :
  - ra. Tĕpisiring lor : panĕpin Dĕsa Isĕh, lan Dĕsa Sĕlat :
- (3) Sajro ning wawĕngkon Dĕsa Tabola. wĕntĕn babañjaran. sowang -sowang mawāsta Bañjar Paptusan .

**DWITYA SARGAH  
PIKUKUH LAN TATUJON**

**Paos 2**

Maka pikukuh . Dĕsa Tabola. ngarajĕgang. mikukuhin. kalih mitindihin pisan :

1. Pancasila. pinaka Dasar Negara Republik Indonĕsia :
2. Undang - Undang Dasar 1945 ;
3. Trihita Karana .

**Paos 3**

Dĕsa Tabola ngamanggĕhang patitis tatujon. lwir ipun :

1. Ngutamayang tata-cara maagama Hindu.
2. Ngawangunang katrĕptyan sajro ning Dĕsa pakraman. mangde kasiddhan rajĕg katrĕptyan prajĕ.
3. Ngawrĕddhiyang kawicakṣaṇan minakadi kaprajñanan. maka larapan gumawĕ gĕmuh landuhing praja.
4. Ngawrĕddhiyang padrĕwya ning dĕsa . majalaran kawicakṣaṇan guna lakṣaṇa mĕnūt dharma-prawrĕtti.
5. Ngarajĕgang Dharmma-agam miwah Dharmma-nagara.

TRITYA SARGAH  
SUKERTA TATA - PAKRAMAN

Palét 1

Indik Krama

Paos 4

- (1) Sané kasinangguh karma désa :
- ha. Sang sapsira ugi jènèk magènah ring wawèngkon Désa Tabola, lintang ring tigang sasih (105 rahina), rajég maagama Hindu :
  - na. Sang sapsira ugi wèd saking Désa Tabola, jènèk magènah ring dura désa liwaring Désa Tabola, nānghing kantun mipil ring bañjar sinalih tunggil sané wèntèn sajro ning Désa Tabola.
- (2) Papalihan pakraman, kadi inucap ring sor puniki:
- Ha. Krama marĕp : wantah karma désa bulangkĕp, sané sampun Mipil ring bañjar paptusan sinalih tunggil sané Wèntèn sajro ning Désa Tabola :
  - Na. Krama sasabu : inggih punika, karma sané during mipil ring Bañjar paptusan, sakadi truna tĕruni, miwah Sané sawosan.
  - Ca. Krama tamiyu : punika karma sakadi sané kinucap ring sor puniki :
    - 1) Sang sapsira ugi saking dura désa liwaring Désa Tabola, jènèk magènah ring wawèngkon Désa Tabola, tan ngawèngku karang pomahan, madunung ring pomahane krama désa, magènah ring pomahan druwèn guru wisésa, hotel miwah salwiripun, lintang ring tigang sasih (105 dina) :
    - 2) Sang sapsira ugi wèd saking liwaring Désa Tabola, makakubon ngènahin palĕmahan : tĕgal, carik, palasan, ring wawèngkon Désa Tabola, nānghing kari manggĕh makrama désa ring désaniya sowing :
    - 3) Sang sapsira ugi jènèk magènah ring wawèngkon Désa Tabola, yan tan maagama Hindu, talĕr sinanggah tamiyu, sakĕwantĕn tan sarĕng sapalikramaning Désa Tabola.
  - Ra. Krama ring dura-désa :
    - 1) Sang sapsira ugi wèd saking Désa Tabola, jènèk magènah ring
    - 2) dura désa liwaring Désa Tabola, nānghing manggĕh mipil ring bañjarniya nguni.

- Ka. Dèśa Sasabu : Sang sapsira ugi sangkaning ngélingang . ngénahin. ñakap . palēmahan palabha pura Pusèh Tabola. tanah ayah dèśa. mānut drēsra-kuna kalih lèkita.

### Paos 5

Ngawit tēdun makrama dèśa ring Dèśa Tabola :

1. Sang sapsira ugi sané wēd kalih jumēnēk ring wawēngkon Dèśa Tabola. sampun mipil ring bañjar papatusan sinalih tunggil sané wēntēn jroning Dèśa Tabola. malarapan antuk . tatēragan bañjar. lwirè : pinaka pangundul wiyadin taju. bulangkēp. ngamongin karang pomahan.
2. Sang sapsira ugi sinalih tunggil wēd saking Dèśa Tabola. sampun tigang śaśih ( 105 ) dina ) jēnēk magēnah ring wawēngkon Dèśa Tabola. katērag antuk bañjar sané ngawawa pagēnahanya.
3. Sang sapsira ugi sinalih tunggil wēd saking Dèśa Tabola. matinggal kadura dèśa. wastu malih mawali ka Dèśa Tabola :
  - ha. Yan sangkaning rahayu patinggalé nguni. wēnang mipil ring bañjar papatusan sinalih tunggal sané wēntēn ring Dèśa Tabola. nganutin sukrētan bañjar punika :
  - na. Yan sangkaning tan rahayu patinggalé ngūni, yoga Kliyang bañjar sané katuju ngatēngahang ka dèśa. mangda kabawosan antuk prakanggèn dèśa . Yan katinutin tatēpasan prakanggèn dèśa punika tur kacihnayang antuk maguru piduka ring Pura Pusèh Tabola. prasiddha kalugra mawali pinaka krama Dèśa Tabola.

### Paos 6

Kabawos husan makrama dèśa ring Dèśa Tabola . malarapan antuk :

1. Sēda :
2. Sangkaning mapinunas ngaraga, ri sampun polih lugraha :
3. Sangkaning kakundulan :
4. Tēdah utawi tilar saking Agama Hindu :
5. Jad : utawi nyada sasampun mayusa 70 tahun :
6. Macihna sungkan – sungkanan :
7. Kasēpēkang utawi kahēladang antuk Dèśa, sangkaning satata mamurug Awig – awig. paswara, kalih pararēm dèśa :



Paos 7

(1) Swadharmma karma dĕśa :

- Ha. Krama dĕśa marĕp yoga kĕni pāyah - ayahan. tatā turun cumĕk. Nānggra sarāja kāryyan dĕśa. māanut unggwan sowing - sowing.
- Na. Krama sasabu. yoga ngarombo sarāja kāryyan dĕśa sanĕ kapucukin antuk karma dĕśa marĕp. tur kahunadikayang antu Prakanggĕ dĕśa.
- Ca. Krama tamiyu. yoga ngaturang panahub ka dĕśa . ngamasa - masa Sanangkĕn aci piodalan Agĕng ring Pura Pusĕh Tabola : minakadi Ritatkalaning mapawangun. ngayum wawangunan ring Dĕśa Tabola Panahub gung artha manut pangargan bĕras ( 12 kg ). Dana pawangunan karma suka sakasiddhan. Tur karma tamiyu talĕr wĕnangkĕni tatĕbĕngan.
- Ra. Krama dĕśa ring dura dĕśa : yoga ngaturang panahub ka dĕśa. ngamasa - masa . sanangkĕn Aci Piodalan Agĕng ring Pura Pusĕh Tabola. gung artha ( manut harga bĕras 12 Kg ). Talĕr ngaturang dhana pawangunan . ritatkālaning dĕśa mapawangun. ngayum wawangunan sanĕ kadruwĕ antuk dĕśa. karma suka manut sakasiddhan.
- Ka. Dĕśa sasabu. kaicchĕn mpon kāryya antuk dĕśa. sanĕ kahunadikayang antuk prakanggĕ dĕśa . kaunggahang ring awig - awig Dĕśa Sasabu. nganūtin kuna-drĕsta.
- Da. Sajaba sanĕ mungguh ring hajĕng. karma dĕśa samiyan. yoga saturut ring daging awig - awig Dĕśa Tabola. minakadi paswaran dĕśa. ngutsahayang mangda kasiddhan mapikolih sakadi patitis tatujon dĕśanĕ kinucap ring hayun. tumus mamangguhang kajagatdhita ning praja

(2) Phalapĕksa ning karma dĕśa :

- Ha. Krama dĕśa samiyan yoga polih pasayuban wiyadin pangōban saking dĕśa. salwiring wyawaharanya yoga kabawosan antuk prakanggĕn dĕśa manut tatatitining wyawahara.
- Na.. Krama dĕśa samiyan wĕnang ngalaksanayang pañca yajña sajroning Dĕśa Tabola. mānut dĕśa Kāla patra kalih nganutin sanĕ kinucap sajroning sāstra = agama manut drĕsta.

- Ca. Krama désa marĕp, miwah désa sasabu, wĕnang polih babagiyan layuban aci - aci salwir ipun, twas - twasan, miwah sawosan sanĕ patut katiba ring krama désa.

## Palet 2

### Indik Prakanggĕn Désa Tabola

#### Paos 8

1. Désa Tabola kahĕmong antuk Prakanggĕn Désa Tabola, minakadi prajuru désa.
2. Prakanggĕn désa, lwirĕ :
  - Ha. 1. Pingajĕng désa Tabola : sanĕ kahadĕgang dados pingajĕng désa Tabola, sadiri - sadiri saking wawĕngkon Geria - geria ring Bañjar Punia, saking Jero Gede Jero Kanginan Sidĕmĕn, saking jero Pakandĕlan Pingajĕng Arya Wang Bang Sidĕmĕn, sanĕ sampun kasudi kapakusara sajroning kuwu sowing - sowing.
  2. Pingajĕng Désa Tabola kamanggĕhang Pangadĕgĕ sajroning pasamuhan Désa Pakraman Tabola satunggil ngadĕgang Prakanggĕn Désa.
  3. Swadharmman pingajĕng Désa Pakraman Tabola, sarĕng mikayunin kalih mamibawosin, agĕnu rasa bhawa rasa, sajroning midabdabin désa, sawĕrat - wĕrat ipun, saking pinunas prakanggĕn désa, mangdĕ kasiddhan ngulati kajagaddhitaning désa. Ritatkalaning Pasamuhan Désa pacang ngadĕgang Prakanggĕn Désa. Pasamuhan punika kahamong antuk Pingajĕng Désa kantos puput.
- Na. Kĕliyang Désa.  
Pamadĕn Kĕliyang Désa.  
Pañarikan.  
Sĕdahan utawi Juru Raksa.  
Patangan utawi Panglima
- Ca. Kĕliyang - kĕliyang bañjar papatusan, kĕliyang - kĕliyang subak sanĕ wĕntĕn sajroning Désa Tabola, sami punika prajurun désa.

#### Paos 9

- (1) Sanĕ wĕnang kahadĕgang wiyadin kamanggĕhang dados prakanggĕn Désa Tabola : lwirĕ :
  - Ha. Mŭla wĕd jĕnĕk magĕnah, saha makrama désa saurah-arĕh ring Désa Tabola.

- Na. Tan cědangga, sakadi pécéng, pérot, cungh lan sapanunggilan ipun.
- Ca. Wikan mabawos kalih ģurat aksara Bali utawi latin.
- Ra. Tan nahėn mabukti malaksana corah.
- (2) Pidabdab ngadėgang prakanggėn dėsá :
- Ha. Paruman Dėsá ngawėntėnang sasėliran. Pangawit paruman dėsá matujuwang sang pacang kahadėgang dados panglingsir utawi Kėliyang Dėsá, yan kantos lintangan ring asiki sanė katuju antuk paruman dėsá yogya pinilihan, sanė akėhan wėnang turut.
- Na. Munggwing ngadėgang pamadėn Kėliyang , pańarikan, sėdahan utawi juru rāksa, kalih patangan utawi panglima, saking pańudin kėliyang dėsá sanė kabriyukin antuk paruman dėsá, talėr sanė akėhan wėnang turut.
- Ca. Laminė madėg parkanggėn dėsá wantah limang warsa, sajaba kapadgakālan.
- ra. Ya sampun nahėn madėg pinaka prakanggėn dėsá, wėnang kasudi malih sajroning paruman dėsá.
- Ka. Yan wėntėn sinalih tunggil piwal kālaning kasudi antuk paruman dėsá, sang piwal punika wėnang katiwakin panglokika, yan tan mańut paksanya, yogya kabawosin antuk paruman dėsá. Yan jāti paksanya paruman dėsá wėnang ģudi sanė sawosan.

#### Palet 10

Swadhamma ring Prakanggėn Dėsá :

- 1) Midabdabin dėsá, karma dėsá, pacang ngupadi kajagaddhitan sakala niskala maka darśana awig-awig dėsá, paswaran dėsá, pamutus pararėm dėsá, nganutin ugėr-ugėr nagara minakadi kojaring śastrā Agama Hindu.
- 3) Ngarāńcana salwiring sanė ģandang pacang wangunang, kasiddhan polih palugrahan guru wisėša.
- 4) Maosin salwiring wyawahara sanė wėtu sajroning dėsá Tabola, niwakang pamutus utawi tetimbang, Yantan kasiddhan kabawosan ring dėsá, prakanggėn dėsá ngaturang ring guru wisėša mangda kabawosan.
- 5) Mratyaksa, nulingayang saparipolah prajuru dėsá, lwirė : Kėliyang bańjar papatusan, kėliyang subak, kėliyang Dalėm, Pamangku Dėsá ( Pusėh, Dalėm ) minakadi sanė sawosan sanė wėntėn sajroning wawėngkon Dėsá Tabola.

- 6) Midabdabin pammargin salwiring haci-haci ring Désa Tabola. talér nulingayang karma désa indiké mgalaksanayang Pañca Yajña
- 7) Prakanggén Désa wénang nanggra salwiring pituduh. monakadi sarāja kāryya saking guru wisésa wérat utawi ringan. sané yogya katiwak ring désa pakraman
- 8) Nanggra sarāja kāryya ri tatkāla Bhatāra ring Basakih turun kabéh. marérépan ring Puséh Tabola. manut Rāja purana Pura Basakih

#### Paos 11

Phalapékça ring Prakanggén Désa

- 1) Luput daging miwah salwiring paturunan wyadin wawijilan.
- 2) Wénang polih twas-twasan.
- 3) Wénang polih pasolasan saking hupon-hupon tanah labha Pura Puséh Tabola minakadi pasolasan artha bhraha piilih guna kaya désa sajaba panupon tanah palabhan. sané ngarañjing ka Désa Tabola saking rahayu
- 4) Miwah sané sawosan manut pamutus paruman désa.

#### Paos 12

Prakanggén Désa kagantosin. majalaran antuk :

- 1) Seda
- 2) Mabukti sungkan-sungkakan
- 3) Mapinunas sakngkaning rahayu. sasampun polih lugraha
- 4) Majalaran tutug sêngkêr pangadègè
- 5) Sangkaning kahusanan antuk Paruman Désa

#### Palét 3

Indik Sangkêpan Miwah Paruman utawi Pasamuhan

#### Paos 13

Mungwing sangkêpan miwah paruman utawi pasamuhan sajroning wawéngkon Désa Tabola kadi ring sor puniki

- 1) Sangkêpan prakanggén désa. magénah ring Bale Agung Puséh Tabola. wiyadin gènah sawosan napkala dinā Buda wage yan tan kasiddhan rahina punika. wénang karangkadang apanutan. tegesipun malih limang rahina saking dina pasangkepangé

- 2) Sané patut nĕdunin sangkĕpan punika. Kĕliyang-kĕliyang Pura Dalĕm. Kĕliyang-kĕliyang Subak. Kĕliyang Dĕsa Sasabu. Pamangku Pura Pusĕh. minakadi sang sapisira ugi sané kabuwatang antuk prakanggĕn dĕsa.
- 3) Maka manggalaning mababawosan. manggĕh panglingsir prakanggĕn dĕsa Tabola.
- 4) Paruman utawi pasamuhan Dĕsa Tabola :
  - Ha. Sané yogya tĕdun sarĕng sajroning paruman wiyadin pasamuhan Dĕsa Tabola. sang sapisira kapatut sarĕng sajroning sangkĕpan Dĕsa Tabola. mawĕwĕh kĕliyang-kĕliyang bañjar papatusan. kĕliyang-kĕliyang Pura Kahyangan Dĕsa. Kĕliyang-kĕliyang Pura Pamaksan. Kĕliyang taruna-taruni. minakadi sapisira sané kabuwatang. manut pangundang wiyadin panuhur Prakanggĕn Dĕsa.
  - Na. Paruman wiyadin pasamuhan punika kawĕntĕnang pinih sor ngalih tĕmwang. mungguwing dina minakadi gĕnah pasamuhan. nganutang dĕsa kĕla patra. mawit saking pamutus babawos sangkĕpan Dĕsa Tabola.
  - Ca. Pasamuhan punika. talĕr wĕnang kawĕntĕnang padgatkĕla. manut wĕrat wiwarané sané patut kabawosang. ma wit saking pamutus babawos pararĕman sajroning sangkĕpan Dĕsa Tabola.
- 5). Sangkepan Pura Dalĕm :
  - Ha. Sané patut nĕdunin sangkĕpan Pura Dalĕm punika. Kĕliyang-kĕliyang bañjar papatusan sané kawĕngku antuk Pura Dalĕm punika pinaka pamakṣan dalĕm. manut awig Pura Dalĕm ika swang. Kalih ngundang wiyadin nuhur sang sapisitra sané kabuwatang antuk pamaksan punika.
  - Na. Pinaka manggala sajroning sangkĕpan kalih patĕdunan krama Pura Dalĕm. yogya kliyang Pamaksan Pura Dalĕm punika.
  - Ca. Sangkĕpan ring Pura Dalĕm hugi ngasasih. Yan wĕntĕn wiwara mabuwat minakadi padgatakĕla. wĕnang nganggĕ patĕdunan majalaran antuk arahan.
  - Ra. Mungguwing dinĕn sangkĕpan. manut sukrĕtan Pura Dalĕm swang-swang nanghing ugi sadurung sangkĕpan ring bañjar papatusan. sajaba yan sangkĕpan kapanutang.
- 6). Sangkĕpab Bañjar Papatusan :
  - Ha. Sangkĕpan bañjar-bañjar papatusan. ugi ngaśasih teges ipun 35 dina. dinĕn ipun manut awig bañjar swang-swang.

- Na. Kĕliyang bañjar pinaka manggala ring sangkĕpan Bañjar Papatusan.  
Ca. Sayā. manut pagilih hurak.
- 7). Sangkĕpan sĕkĕha-sĕkĕha. pamaksan. sané wĕntĕn sajroning Dĕsa Tabola. manut awig-awig sĕkĕha kalih pamaksan swang-swang. lwire : Sĕkĕha subak. Dĕsa Sasabu. Truna-truni miwah sané sawosan.

#### Paos 14'

Tata Kramaning Sangkĕpan. paruman utawi pasamuhan :

- 1) Sayā patut makta pasayaan. tĕgĕp ĕtĕh-ĕtĕh pasayaan salwir ipun. minakadi haturan canang panaracak. saha pasĕgĕh.
- 2) Yan kapatut pacang nganggĕn bantĕn sakabwatan. Prakanggĕn Dĕsa. Kĕliyang Dalĕm. Kĕliyang-kĕliyang bañjar papatusan. yogya mituduhang mangda cumawis. saha ñusrahang padagingan ipun.
- 3) Sayā wĕnang nĕpĕk tĕnggĕran ping kalih :  
Ha. Kaprathama : sadurung ngawit upacarā utawi māturan.  
Pinaka pakĕling mangda gĕlis carĕm.  
Na. Sasampun Carĕm. ngararis haturan punika kahantĕbang . mabriyuk muspa sarĕng sami kantos puput.  
Ca. K ping kalih : swaran tĕnggĕran maka cihna sangkĕpan Sampun puput.
- 4). Babawosan sajroning sangkĕpan wiyadin pasamuhan. ugi ngupadi karahayuan jagat. minakadi ngarajĕgang kamuruban Sang Hyang Widhi. majalaran bhawa lakṣaṇa manut catŭr drĕsta luiŕ ipun dĕsa drĕsta. loka drĕsta. kuna drĕsta. miwah sāstra drĕsta.
- 5). Yan wĕntĕn sinalih tunggil ngatĕngahang babawos jroning sangkĕpan. yogya kadamyakang. Yan ñandang bawosin. yogya rinawosin. Yan tan ñandang bawosin. antukang ring sang ngamimitin.
- 6) Sané kinucap sang pamutus babawos wiyadin paswara jroning sangkĕpan. paruman minakadi pasamuhan. yan briyuk sapanggul hanut sang ñangkĕpin. Yan tan sapunika. asing akĕhan wĕnang turut manut lokika. Pamutus babawosan yogya kalĕkitayang. kalaksanayang manut hanggĕran ipun.
- 7). Sangkĕpan punika kabawos puput. yan sampun nimbalang pagilih sayā. urak. saha sampun mabacak.

Palet 4

Indik Kukul

Paos 15

- 1). Sajroning wawěngkon Désa Tabola, wéntěn babacakan kukul, kadi ring sor puniki :
  - Ha. Kukul désa kabawos Těgtěg-agung.
  - Na. Kukul pura kabawos Kukul pamaksan.
  - Ca. Kukul Bañjar.
  - Ra. Kukul sěķěha-sěķěha sawosan.
- 2). Mungwing swaran kukul punika mangda mabhina-bhinayan sawiji sowing, manut sor singgih. Yan wéntěn swaran kukul patěh, karun wiyadinsawěr mangda kapastika salah sawiji, antuk sang madruwé.
- 3). Něpěķ kukul manut Tri Brata Sandi : dharma, śima, laksana, Těgěsipun :
  - ha. Dharmma : swasran kukul maka cihna wiyadin tatěngěr agama Wiyadin yajña.
  - Na. śima : swaran kukul maka cihna wiyadin tatěngěr pañca Bhaya.
  - Ca. laksana : swaran kukul maka cihna wiyadin tatěngěr Patědunan.
- 4) Indik tatěpěķan kukul manut pasobhaya minakadi kuna drěsta, paswara.
- 5) Unggwan něpěķ kukul :
  - Ha. Yan něpěķ kukul tatěngěr patědhunan, hugi kukul sané kadruwé antuk sěķěha, karma, sané pacang tedun, katěpěķ sang patut ngulkulang.
  - Na. Yan něpěķ kukul tatěngěr pañca bhaya, wěnanng saunggwan-unggwan asing nampěķ gěnahé, wěnanng katěpěķ antuk sang rihinan manggihin bhaya punika, minakadi patiduh sang ngawiwěnanng.
  - Ca. Yan něpěķ kukul tatěngěr upacara agama, dēwa yajña, bhuta yajña, mānusa yajña, pitra yajña, wěnanng kukul sané wéntěn ring swang-swang gěnah upacarané, Yan ñelang kukul sawosan patut wéntěn palugrahan sang ngawiwěnanng.
  - Ra. Yan kālaning ngalungayang bhatāra, mēndak bhatāra, Bhatāra turun kaběh, kālaning pacaruwan désa lwiré mañca sānak, tabuh gěntuh ring désa Tabola, samu kukulé dados swarayang, tatěpěķan manut karma.

- Ka. Yan wëntěn sinalih tunggil mamurug, nĕpĕk kulkul tan manut karma, yoga kabawosan antuk prakanggĕn dĕsa. katiwakang panglokika, saha pamidandha manut paswara.

## Palet 5

### Padruwĕyan Dĕsa Tabola

#### Paos 16

Sanĕ kadruwĕ antuk Dĕsa Tabola, lwirĕ :

- 1). Pura Kahyangan Tiga miwah kahyangan-kahyangan :
  - Ha. Pura Pusĕh Tabola, saha pañatur, lwirĕ : Pura Hĕmbang, Pura Pangalasan, Pura Pĕnĕman -sari, Pura Sĕga.
  - Na. Pura Dalĕm lwirĕ : Dalĕm Bwan, Dalĕm Kikiyan, Dalĕm Boni, Dalĕm Yangtaluh, Dalĕm Cepik, miwah Dalĕm Panggung.
  - Ca. Balĕ Agung.
  - Ra. Pura Kĕntĕl Gumi.
  - Ka. Pura Mlanting.
  - Da. Pura Hulunsuwi sanĕ wĕntĕn jroning Dĕsa Tabola.
  - Ta. Pura-pura kahyangan sanĕ wĕntĕn jroning Dĕsa Tabola, lwirĕ : ( 1 ) Pura Taman Sari, Umagyang: ( 2 ) Pura Panti ( Pusĕh ) Kikiyan: ( 3 ) Pura Puri Agung Ulah: ( 4 ) Pura Purijati: ( 5 ) Pura Gunung Rĕna: ( 6 ) Pura Dĕwangga: ( 7 ) Pura Gunung Sari: ( 8 ) Pura Mrajan Agĕng ( Gdĕ ): ( 9 ) Pura Jumpungan: ( 10 ) Pura Puriañar: ( 11 ) Pura Pucaknĕgara: ( 12 ) Pura Agung Pĕmpatan: ( 13 ) Pura Puribingin: ( 14 ) Pura Gunung Mĕrta: ( 15 ) Pura Panti Bañu campah: ( 16 ) Pura Panataran Lipah: ( 17 ) Pura Panataran Sari: ( 18 ) Pura Aji: ( 19 ) Pura Pandĕbĕsi: ( 20 ) Pura Panataran Pandĕmas: ( 21 ) Pura Gamongan: ( 22 ) Pura Panataran Gumintĕn: ( 23 ) Pura Panataran Banjar Undiasn: ( 24 ) Pura Taman Alit Sindu: ( 25 ) Pura Mĕrajan Agung Ulah.
- 2) Palĕmahan sanĕ kaanggĕn karang pomahanm miwah tĕlajakan karang.
- 3) Palĕmahan sanĕ kaanggĕn sĕtra pakraman, miwah sĕtra panilang-ilangan, lwirĕ: Sĕtra Kikiyan, Sĕtra utawi Tunon Boni, Sĕtra Yangtaluh, Sĕtra Papahan, Sĕtra Panggung:
- 4) Palĕmahan sanĕ kapisukayang ring sang mĕgama Islam, lwirĕ : Kampung Sindu, Puniya, Buhu, miwah sĕtran ñanĕ ( Kuburan Islam ), Batunkapas.
- 5) Palĕmahan sanĕ kaanggĕn margi, rurung-rurung, basing tlabah, sajroning Dĕsa Tabola.



- 6) Bañjar-bañjar papatusan sané wëntěn sajroning wawidanagan Désa Tabola.
- 7) Pasar Désa Sidēměn.
- 8) Tanah-tanah palabha Pura Puséh Tabola. kalih tanah-tanah ayah désa, manut lěkitan tanah.
- 9) Sakañcan kalěbutan toya, toya anakan, tihisan, sané dados kaanggén Pasuciyan Bhatāra, sané dados kaanggén bëji miwah kasalud antuk karma désa. Sané dados tantan ka désa pakraman, sami kadruwé antuk Désa Tabola.
- 10) Lěmbaga Perkriditan Désa.
- 11) Perusahaan Air Minum.

**CATHURTA SARGAH  
SUKRĒTA TATA PALĒMAHAN**

**Palět 1**

**Indik Těgal, Bangkět lan Karang**

**Paos 17**

Palēmahan Désa Tabola mahugěr antuk Tri-Mandala, lwiré :

- 1). Uthama-mandhala : palēmahan sané kaanggén karang pura, wiyadin Paryangan.  
Madhya -mandhala : palēmahan sané kaanggén karang pomahan, gěnah Wawangunan, sakadi: bañjar, sěkolah, kantor, Rumah sakit, miwah sané sawosan.  
Nista-Mandhala : palēmahan sané kaanggén sětra, margi, rurung, Tlabah, papunduk, tulaktanggul, miwah sané Sawosan.
- 2). Sahanan palēmahan sané wëntěn ring wawěngkon Désa Tabola, yogya mangda madruwé babalědan wiyadin watēs sané pasti.
- 3). Sahanan palēmahan punika, hugi mangda madruwé margi, rurung, papunduk, sané dados hěntasin.
- 4). Yan wëntěn pakarangan pura, pomahan, těgal, carik, miwah palēmahan sawosan kaběběng tan madruwé margi, rurung, miwah papunduk, sang madruwé patut ngatěngahang babawosé ka désa, Prakanggén Désa yogya něgděg, ngutsahayang mangda polih margi malarapan sami suka. Yan

- patut matumbas, manut pangargan tanah sané kamanggěhang antuk sang mawarāt, sami katahur antuk sang mamuwatang.
- 5) Yan désa pacang ngalinggahang margi, rurung, makarya margi, rurung désa, saking sampun ingkup paswaran désa, yan nganggén tēgal, carik miwah palēmahan sawosan, wěng tan nahur pangargan tanah punika Nanging yan madaging tatanduran, papayon, wawangunan salwiré, Désa patut ngicén prabéya agung alit manut parēmbug désa.
  - 6). Sahananing karang pomahan hugi mangda masěngkěr, Pidabdab ñengkěr magalěng ka dulu, Pañěngkěr sané sisi kangin miwah kalér, patut kakaryyanin antuk sang ngěnahin karang punika, Sajaba karang ngělė, wiyadin lingkěhin rurung, palēmahan suwung.
  - 7). Sang sapisira hugi ngěnahin karang tēgěhan, patut naku, tēgěhé asukat tanah dangsah, Sane tēbėnan, wěng nyusunin tėmbok.
  - 8). Tělajakan karang patut kapiara antuk sang ngěnahin karang punika sowing-sowang, mangda mapikěnoh tur haśri.
  - 9). Yan wěntěñ sinalih tunggil ñadya ñalěksěk wiyadin ngalěklěk babalėdan salwiring babalėdan wiyadin wawatěsan, lwiré : babalėdan wiyadin watěs pura, karang pomahan, carik, tēgal, sėtra, tlabah, jlingjing, margi, rurung, papunduk, miwah sanėnsawosan, yogya katiwakan dandha manut wrat ringan kahianganė ..... saha mahayu sané kaslěksěk wiyadin kalěklěk, kalih mrayaścita sakabwatan, sané nyandang kaprayascita.
  - 10). Yan hana sinalih tunggil ngalėtěhin, ngarucakin, ngarobėdin, ngararabin, palēmahan liwaring pomahan padruwėyan ñanė, liwré : ngutang luhu, bangkaan, miwah salwir ipun, ñorongang babañon sajaba toyan sabėh, yogya katiwakan dandha gung artha ..... tur mahayu sané kalėtěhan, karucakan, karobėdan, raraban ring hajěng.

## Palet 2

### Indik Kakayonan

#### Paos 18

- 1). Tan kalugra nėbtėb , ngrėbah, wit-witan salwir ipun, ring pālasan, patėgalan, habing, tangkid, miwah gěnahe sawosan, sané kakěkěr antuk désa, Yan wěntěñ sinalih tunggal mamurug, katiwakan dandha manut lokika ..... : taru sané karėbah mantuk ka ėsá.

- 2). Salwiring wit-witan sané sampun kacirénan wiyadin kasawénin antuk Désa. pacang manggé mapawangun ring Désa. pradéné punika karēbah antuk sang madruwé. yoga sang madruwé katiwakan dandha ..... Manut lokika, taru wiyadin wit-witan sané karēbah mantuk ka Désa. wiyadin ngétang pangarga.
- 3). Yan wéntěn wit-witan wiaydin kakayonan ngungkulin palēmahan anak sawos sané ngawinang tiyēb, tampyas, ngarobēdin, asing kungkulan wēnang ngatēngahang ka Désa. Prakanggén Désa maritētēs saha mituduhang sang madrēwé mangda ngrañcap, nēbtēb, wiyadin ngarēbah, yan kantos ping tiga pituduh Désa tan kalingu. wēnang katiwakan dandha sang anikēl tuduh, gung artha manut paswara, kakayonan punika prasiddha karēbah antuk Désa picundhangan.
- 4). Tanēm tuwuh ( kēlapa, jaka ) jroning karang pomahan, tan kalugra tēgēh ipun lintangan ring jan palit solas ( $\pm 5$  m), bungkil ipun adēpa agung ( $\pm 2,5$  m) saking pañngkērē ngajrowang. Yan mamurug wéntěn ngatēngahang ka Désa, yoga sang madruwé katiwakan dandha gung artha manut paswara : saha ngarēbah sajroning tigang rahina sakng pamuput babawosé.
- 5). Kakayonan jroning karang pomahan hugi mapyara mangda tan ngalētēhin, ngarobēdin, mamayén, karang sawosan, saking akah kantos daun ipun. Yan wéntěn mamurug, tan tulinga ring kakayonan duwé wéntěn ngatēngahang ka Désa, prakanggén Désa yoga maritētēs, saha nēpasin manut panglokika.
- 6). Yan wéntěn wit taru mēntik kantos agēng ring babalēdan, watēs, salwiring babalēdan mwang watēs, wéntěn ngatēngahang ka Désa, patut taru punika karēbah, raris pinara tiga, apahtigayang mantuk ka Désa, sang madruwé babalēdan apahtigayang sowing-sowang.
- 7). Yan wéntěn sinalih tunggil nundungin tanēm tuwuh, kakayonan, sané kaswatah pacang mamayén, wēnang kabawosang ring sang madruwé. Yan akas sang madruwé, yoga katēngahang ka Désa, Prakanggén Désa nēgdēg tanēm tuwuh wyadin kakayonan punika, yan manut panglokikan prakanggén Désa yoga tundungin, talēr akas sang madruwé, patut sēpat gantungin. Yan jati kadi pañwatahē yoga sajroning tigang dina, karēbah picundangan. Sang madruwé katiwakan dandha gung artha manut paswara dosané anikēl tuduh. Yan tan yukti kadi pañwatahē, sang ngatēngahang katiwakan dandha gung artha manut paswara dosané angadakakēn nora. Tanēm tuwuh wyadin kakayonan punika karēbah.

- 8) Yan wéntèn sinalih tunggal ñadya nandur pijër. turus. salwiring taném tuwuh wyadin kakayonan sané pacang dados agëng. nésëk ring babalédan. ring watës. papunduk. hugi masupëksa ring prakanggén désa. kalih ring pañanding sowing-sowang. Yan tan kalugra tan kapisukayang piradéné kapurug. yogya sang mamurug katiwakan dandha gung artha manut paswara tur ngamadhëmang tatandurané.

### Palet 3

#### Indik Wawangunan

##### Paos 19

- 1). Sang sapisira hugi krama désa sawawëngkon Désa Tabola. yan pacang ngawangun pañëngkër karang pomahan. patut masupëksa ring pañanding. Yan tan radin yogya nunas dëgdëgan ring Prakanggén Désa. Prakanggén Désa nëgdëg saduhajëng sang mawiwara.
- 2). Wawangunan ring palëmahan pëcak carik. tëgal. palëmahan suwung. sané sampun masanggah pawon. palëmahan punika prasiddha kabawos karang pomahan. dawning sampun katiwakan pangupakāran karang. awanan patut madriwé rurung bëtél ka margi agung. sukat dados ngalintangang papaga. dawning tan kapatut ngalintangang śawa ring carik miwah tëgal. Yan wéntèn mamurug. yogya prakanggén Désa niwakang tatëpasan mangda sang mamurug mrayaścita palëmahan hinucap.
- 3). Yan tan masanggah panguluning karang. kabawos akakubon. Tan yogya gënah angrakša śawa. Yan wéntèn mamurug. yogya katiwakan pamidandha mrayaścita palëmahan ika.
- 4). Yan wéntèn sinalih tunggal pacang ngawangunang wawangunan gënah ngalaksanayang upacara agama luwiré : Pura. Masjid. Geréja. Wihara. miwah sané sawosan. hugi mangda wéntèn lëkita palugrahan prakanggén désa. kali lëkita palugrahan guru wisëša. yan wéntèn mamurug. kabawos tan siddha kārÿya. tan wënanng anggënen.
- 5). Wawangunan jroning karang pomahan. hugi nganutin Tri-mandhala : utama mandhala. sanggar panguluning karang. Madhya mandhala. pagënanahan mapumahan : ništa mandhala. ngaran lëbuh. janayan.
- 6). Tan wënanng ngungkulang capcapan wawangunan ka jroning karang pomahan sawosan tani druwé. Yan wéntèn mamurug. wéntèn ngatëngahang ka Désq. yogya prakanggén Désa nëgdëg saha ñipāt gantungin. Yan jati lintang sajroning selahé rahina saking puput babawose mangda sampun kapaštika

- 7). Tan wĕnang nganggĕn tĕmbok umah wyadin tĕmbok pañĕngkĕr tani druwĕ. Wĕnang ya kasambatsara antuk sang madruwĕ. Yan akas tur mamurug sang kasambatsara. yogya katĕngahang ka Dĕśa. Kababwosan antuk prakanggĕn Dĕśa.
- 8). Sang sapisira ugi pacang mapawangun nĕpi ring margi agung. nĕpi rurung Dĕśa. yogya wĕntĕn lĕkita palugrahan sang mawā rāt. wiyadin likita palugrahan Prakanggĕn Dĕśa Tabola. Yan tan polih lekita palugrahan padgatkāla wawangunan punika dados katundungan tan ngĕtang prabhĕyan tatundungan.
- 9). Sang sapsira hugi ngawĕngku karang pomahan. yogya hurtai myara kahaśriyan lĕbuh pakaranganya. rurung pĕntasan pinih sor asukat karangnya ngalajur.

#### Palet 4

#### Indik Wawalungan

#### Paos 20

- 1). Sanĕ kinucap wawalungan. sakañcan buron suku pat sanĕ ñadya. kapyara. sakadi : bantĕ. kambing. kĕbo. misa. jaran miwah sapanunggilan ipun taler watĕk makampid sanĕ ñadya kapyara. sakadi : ayam. itik. hangsa. dolong. miwah sababacakan ipun.
- 2). Sang sapisira hugi krama Dĕśa sanĕ myara wawalungan suku pat. sajaba hasu tan wĕnang ngalumar. Sanĕ patut matlusuk . mangda matlusuk: sanĕ tan patut matlusuk . mangda matĕgul : sanĕ patut maglogor. makandang. patut maglogor wiyadin makandang. Mangda tan ngarucakin. ngalĕtĕhin palĕmahan tani druwĕ. miwah mamayĕn krama dĕśa jana pada. Yan hasu mangda mabĕlat. Iwirĕ : makalung bawong. maka cihna wĕntĕn sanĕ miyara.
- 3). Sang sapisira hugi krama dĕśa. miyara watĕk suku kalih. watĕk makampid. yatnain hugi. mangda tan bangĕt ngarucakin. ngalĕtĕhin. palĕmahan. pomahan. tatanduran druwĕn anak sawos.
- 4). Tan wĕnang ngangonang. nĕgulang. hingon-hingon ubuh-ubuhan. ring palĕmahan tan druwĕ. minakadi tan sasakapan druwĕ yan tan kapisukayang. Sang madruwĕ palĕmahan. prakanggĕn Dĕśa . langlang Dĕśa. kĕliyang-kĕliyang asing mamanggihin. wĕnang ñambatsara sang madruwĕ wawalungan ika. Yan hakas sang kasambatsara. wawalungan ika wĕnang taban. Prakanggĕn Dĕśa yogya niwakang pamidandha . manut lokika. gung artha manut paswara.

- 5). Tan wěnanḡ ngangonang, nēgulang ubuh-ubuhan, ring palēmahan karang pura, kahyangan salwir ipun, minakadi setra, rurung, papunduk, margi, tēlajakan tan druwē, palēmahan sanē kapingitang, karang suhung, miwah sababacakan ipun, Yan wěntěn mamurug, sang madruwē palēmahan, Prakanggěn Dēsá, langlang Dēsá, kēliyang-kēliyang banjar, prajuru Dēsá sinalih tunggil asing mamanggihin, wěnanḡ ñambatsara, saha naban wawalungan ika, Katěngahang ka Dēsá, Katiwakan dandha gung artha manut paswara saha mahayu yan wěntěn karusak, tur mrayaścita palēmahan ika sanē ñandang prayaścita, manut panglokika.
- 6). Yan wěntěn maubuh-ubuhan sajroning karang pomahan, hugi tlajan mratyakşayang kandang ipun, mangda tan ngawētuanḡ bhaya, pañungkan, Talěr mangda hapik, guritěn, sikşá, mangda tan kanots ngalētěhin, ngobětín, cěrobo karang pomahan wiyadin palēmahan pañandingē, Yan wěntěn mamurug, tan sikşá, ring hingon-hingon miwah kandang ipun, wěnanḡ pañandingē ñambatsara, Yan hakas sang kasambatsara, wěnanḡ katěngahang ka Dēsá, prakanggěn Dēsá nēpasin, Wěnanḡ katiwakan dandha, manut panglokika.
- 7). Sang sapaşira hugi krama Dēsá, ngawangunag kandang wawalungan : buwat adol atuku : kandang ayam, itik, miwah sapanunggilan ipun, buwat naluhang miwah adol atuku, Yan kandang wawalungan suku pat, dagingan adasa hukud : yan kandang ayam, itik miwah sapanunggilan ipun, dagingan satus ukud, sowing, ikā wěnanḡ jroning karang pomahan, Yan lintangan, ring punika daging kandangē, tan wěnanḡ wangunang jroning karang pomahan, yogya kawangunang ring palēmahan sanē mawaněng sa sor ipun sēkět dēpa saking palēmahan karang pomahan, sěkolah, kantor, pura kahyangan, minakadi gěnah sanē kakěkěr antuk Dēsá Tabola, Tur mangda malěkita palugrahan saking sang māwa bhumi.
- 8). Yan wěntěn wawalungan ngarucakin, ng rug tatanduran, wěnanḡ taban, Sang madruwē tatanduran ngatěngahang ka Dēsá pramangkin, kabawosan antuk prakanggěn Dēsá, saha katiwakan dandha manut lokika.
- 9). Yan goděl, sėbantěng, kēbo misa, during matlusuk : goděl, jaran, kambing, miwah sabacakan ipun, durung hantēs matěgul, tan wěnanḡ taban, yan tan ngajak hinan ipun, Yogya salabarang ring sang madruwē.
- 10). Yan bėbėk, dolong, hangsa, ayam, miwah sapanunggilan ipun, ngarucakin tatandhuran, talěr wěnanḡ taban, indikē naban, mangda masakşí, saha kasupėkşayang ka Dēsá pramangkin, prakanggē Dēsá yogya mamawosin niwakang pamidandha manut panglokika.

- 11) Yan wéntěn wawalungan ngěleb, maměgat . ngarañjingin palēmahan pura kahyangan, sětra, karang pomahan, miwah saně sawosan . lokikaněn juga. Yan tan ñadya ka lěbang, tan yogya taban, wěnanng salabarang ring sang madruwě. Yan ñadya ka lěbang, wěnanng taban, tur katěngahang ka Děśa.
- 12) Sang sapašira hugi krama Děśa Tabola, tan kalugra ñorongang babanon lalětěh kandang wawalungan ka talabah, jalingjing, saně wéntěn sajroning Děśa Tabola. Yan wéntěn mamurug katiwakan dandha antuk Děśa gung artha manut lokika, saha sajroning pitung rahina saking pamuput babawosě, kalih salantur ipun tan kari sorong babañon miwah lalětěh punika.
- 13) Sang sapašira hugi ngarěrěh ulam ring tukadě, ring tělabahě, ring jalingjing miwah sahunggwaning ulam sawawěngkon Děśa Tabola, tan wěnanng nganggèn tuba salwir ipun, ngarusak hěmpělan, miwah tamuku, yan wéntěn mamurug wěnanng katiwakan dandha gung artha manut lokika, mahayu saně karusakang.
- 14) Sakañcan dadandhan, dadošan saně mungguh ring hajěng, sami mantuk ka Děśa Tabola.

## Palět 5

### Sukrěta Pamitěgěp

#### Kaping 1

### Pamidadandha Miwah Dadosan Patědunan

#### Paos 21

Pamidandha wiyadin dadosan patědunan, sangkěpan, tědun makaryya miwah saně sawosan, nganutang sukrěta sowing-sowang, lwirě :

- 1). Yan prakanggèn Děśa madruwě patědunan, yogya nganggèn sukrětan děśa saně kagadhuh antuk prakanggèn děśa. Dadosan ngarañjing ka děśa.
- 2). Yan babañjaran madruwě patědunaně, yogya nganggě ugěr sukrětan bañjar sowing-sowang saně sampun kagadhuh. Dadosaně ngarañjin ka bañjar.
- 3) Yan subak madruwě patědunaně, yogya nganggèn ugěr sukrětan subak saně sampun kagadhuh antuk subak sowing-sowang. Dadosaně ngarañjing ka Subak.
- 4) Yan sěkěha-sěkěha sawosan . madruwě patědunaně, yogya nganggě ugěr sěkěha sowing-sowang . Dadosaně ngarañjing ka sěkěha.
- 5) Yan wéntěn sinalih tunggal lan tinūt ring tatěpasan miwah dadosan punika, yogya katěngahang babawosě ka Děśa. Prakanggèn děśa wěnanng mamawosin.

## Ka ping 2

### Indik Bhaya

Paos 22

- 1). Sané kinucap Pañca-bhya. Iwiripun :
  - Jiwa bhaya
  - Aghni bhaya
  - Toya bhaya
  - Artha bhaya
  - Bayu bhaya
- 2). Salwiring bhaya wĕnang gĕgĕrang antuk swaran kulkul.
- 3). Sang sapisira hugi krama Dĕsa sanĕ manggihin. wyadin huning ring panangkaning bhaya. ring kang katibĕn bhaya. wĕnang ngĕgĕrang nĕpĕk kulkul manut indik kulkulan bhaya. raris danyakang ring wādĕsa.
- 4). Rikala wĕntĕn swaran kulkul bulus tatĕngger bhaya. krama dĕsa patut yatna sayaga. saha srĕgĕp ngamong prabot wiyadin gagawan sowing-sowang.
- 5). Yan sampun tatas ring bhaya punika. krama dĕsa patut matatulung nambakin wiyadin ngamĕsĕhin bhaya punika. manut hunggwan. kalih manut patuduh sang yoga ngawiwĕnangang.
- 6). Sang sapisira hugi tan kawasa majajabur ri kĕla ning Dĕsa. krama dĕsa katibĕn bhaya. Yan wĕntĕn sinalih tunggal kacirĕnan mamurug. yoga katĕngahang ka Dĕsa. wiyadin kĕtur ring sang amawa bhumi. mangda kabawosan.
- 7). Yan pinganan bhaya punika sampun kapinĕh nahnah. tan pacang ņangkalĕn wĕnang kacihnayang antuk swaran kulkul lambat atuludan. wiyadin pasiar saking sang ngawiwĕnangang.

## Ka ping 3

### Indik Rarampagan

Paos 23

- 1). Dĕsa Tabola wĕnang ngarampang. ri tatkĕla pacang mapawangun. ngayum wawangunan ring Pura Pusĕh Tabola. Iwirĕ : mĕru. pasamuhan. bale agung. miwah sanĕ sawosan. ngarampang ring patĕgalan. palasan. karang suhung. sanĕ wĕntĕn sawawĕngkon Dĕsa Tabola. Sanĕ wĕnang rampage. wit campaka. wit nangka. wit tĕhĕp. wit wangkal. wit kalapa. sanĕ sampun wayah pinganan dados anggĕn lakar wawangunan.



- 2). Munggwing indik ngarampag taru. wit kalapa. hugi majalaran antuk paswara. pamutus pasamuhan Désa Tabola. bwaté ngamargiyang rarampagan, kadamyakang ring krama Désa.
- 3). Yan druwén Ida Sang Brahmana, sang mawā rāt, patut nunas. Ida tan dados tan ngicchèn.
- 4). Indik ngrampag raramon. Iwirè : ron, busung, hambu, tihing, sahang, Ri tatkāla : Pujawali patirthan Bathara ring Pusèh Tabola, kāla pūrnnama ning śāsīh Kapat: Pacaru Tabuh Gěntuh ring Désa Tabola : Bhatara turun kabèh, lungha ka Pusèh Tabola : Karyya agung sawosan sakadi Ngěntěg, nubung daging ring Pusèh Tabola.  
Wěnanng ngarampag ring patěgalan, palasan, karang suhung, sajroning palēmahan Désa Tabola. Indikè ngarampag sakadi ring sor puniki :  
Ha. Wěnanng ngarampag wantah asoroh sajroning asukat.  
Na. Hambu amuncuk sajroning asukat.  
Ca. Busung amuñcuk sajroning asukat.  
Ra. Ron kalih papah sajroning asukat.  
Ka. Tihing akatih sajroning alingsěh, manut pagilih rarampagan ( sukat tihing dados anggèn tali, tan kawasa ngudanan, Wayahan wěnanng ).  
Da. Carang taru sané ngungkulin margi agung, rurung désa. Wit taru ring tanah ayah désa, hamung carang ipun dados rampag.
- 5). Godél sané pacang anggèn pacaru ( baying-bayang ) wěnanng rampag, anghing matahur manut pangargga.
- 6). Yan kalaning ngarampag, sang ngarampag hugi masadok ring sang madruwé wiyadin ring pañakap sinalih tunggil, saha sadu hajěng, Yan tan masadok dandha sang ngarampag, gung artha sakadi pangargan sané karampag anikěla.

#### **K a ping 4**

#### **Pañanggran Bañjar, Désa Sasabu, Sěkěha Truna**

#### **Paos 24**

- 1). Rikāla Pūjawali Patirthan ring Pura Pusèh Tabola, ring pūrnnama ning Kapat ngamasa-masa, kasanggra antuk bañjar-bañjar manut pagilih sasubakan, Désa Sasabu, minakadi sěkěha truna sané wěntěn jroning Désa Tabola. Désa Sasabu ngawijilang pisang 6000 bulih, klapa 250 bungkul, ayam 36 hukud.

- 2). Ri kāla masēgēh miwah ngēbēkin ring Pusēh Tabola. karyyané kasanggra antuk bañjar-bañjar manut subak Désa Sasabu ngamijilang piturunan : Kalaning maēgēh : pisang 3000 bulih, klapa 150 bungkul. ayam 15 hukud. Kāla ning ngēbēkin, pisang 4000 bulih, klapa 250 bungkul. ayam 20 hukud. Punika pinaka upētīn labha Pura Pusēh Tabola sané kaélingang wiyadin kagēnahin.
- 3). Ri tatkāla Kāryya Tabuh Gēntuh ring Désa Tabola. ri kāla Bhatāra ring Basakih turun kabéh saha tēdun ka Pusēh Tabola . minakadi kāryya agung sané kawētēnang padgatkāla. karyyané kasanggra antuk krama désa babañjaran sami. Désa Sasabu, Sēkēha truns. sané wentēn jroning Désa Tabola.
- 4). Saraja kāryya kahunadika. kahorēgang antuk Prakanggēn Désa Tabola karombo antuk prajuru sinamiyan.

## PAÑCAMA SARGAH SUKRĒTA TATA AGAMA

### Palet 1

#### Indik Kahyangan

#### Paos 25

- 1). Pura Pusēh, Balé Agung, Pañatur Pura Pusēh, Mlanting, Kēntēl-gumi, punika kahēmponin antuk krama Désa Tabola sami. manut pagilih pangaci-aci. sapunika talēr indik papayon . kahēmponin antuk désa . sajaba duk pacang krēb Balé Agung . Dēning duk krēb Balé Agung punika kawijilang antuk sang madruwé carik ring wawēngkon Désa Tabola. manut kuna drēsta. kalih paswara.
- 2). Munggwing Pura Dalēm, prajapati. papayon kalih pangaci-aci kahēmponin antuk pamakṣan krama désa sané ṅungsung Bhatāra ring Pura Dalēm punika sowing-sowang.
- 3). Pura Hulunsuwi, papayon kalih pangaci-aci kahēmpon antuk krama subak sané ṅungsung Bhatāra ring Hulunsuwi punika sowing-sowang.
- 4). Pura-pura, kahyangan sané sawosan ring sané kinucap ring hayun, papayon kalih pangaci-aci kahēmpon antuk krama pamaksan sané ṅungsung Bhatāra ring Pura Kahyangan punika sowing-sowang.
- 5). Munggwing bēji, papayon kalih pangaci-acinya. kahēmponin antuk krama désa sané ṅabēn ṅalud toya punika kabawos pamaksan sēkēha bēji.

- 6) Yan wěntěn karěcěhan, wicara, sajroning pamaksan Pura, bëji, kahyangan sinalih tunggal, wěnanng katěngahang ka děsa : prakanggěn děsa mamawosin něpasin wicaraně, mangda kasiddhan mawali landuh jatimula.
- 7) Tan wěnanng nguwah nguwhin wawilangan palinggih bhatāra, saně sampun wěntěn ring Pura Kahyangan sowing-sowang, mangda kantun manggěh kadi kuna.
- 8) Yan wěntěn sinalih tunggal Pura Kahyangan, rěněng pangaci-acinnya kantos kadaśawaršan, yogya prakanggěn Děsa Tabola mamawosin, ngutsahayang pisan mangda kasiddhan mawali kadi jatimula, Nanghing pradé tan kasiddhan prasiddha Děsa Tabola ngupakara mralina pura punika, mangda tan kaumahan antuk Ki Bhuta Kubaᅇda.

## SUKRĒTAN PURA KAHYANGAN

### Paos 26

- 1). Rikālaning amturan hamung pamangku ring Kahyangan punika dados mungguh tēdun ring palinggih-palinggih pura kahyangan inucap. Sajawaning sang sampun polih lugraha saking prajuru, Yan wěntěn mamurug katiwakan dēndha mrayaścita palinggih punika.
- 2). Pamangku saně patut ngantēbang baněn ring pura, wantah Pamangku saně kadruwě antuk pura punika, Yan wěntěn pamangku ring pura punika utawi kapyalang dados nyarad pamangku sawosan palugrahan Prakanggěn Děsa Tabola.
- 3). Tan kalugra masumpah, ma coran sajroning pura kahyangan sinalih tunggal, sajaba sangkaning wicaran pura hinucap, talěr saking pabuwat krama děsa saně ngēmpon Pura Kahyangan sowing-sowang.
- 4). Tan kalugra wak pacala sakadi mamisuh miwah sapanunggilan ipun, hasta capala (nyagur), pāda capala sakadi nēndang, nlějěk, miwah sapanunggilan ipun, sajroning pura kahyangan, Yan macihna wěntěn mamurug, wěntěn raris ngatěngahang ka děsa yogya tiniwakan dēndha pamarisuddhan kahyangan.
- 5). Tan kalugra malaksana ngantos ngawětuwang biota ring pura kahyangan, Yan wěntěn mamurug, akntos maywadi ring pura, yogya tiniwakin dēndha gung artha manut pangargan bėras adaśa kilogram kang sawiji saha marisuddha kahyangan.

- 6). Sang sapsira hugi kacuntakan, slawiring cuntaka, yan durung maběrsih, tan kalugra ngarañjing ka Pura Kahyangan. Yan katěngkěr wěntěn mamurug, yogya tiniwakin dandha marisuddha kahyangan punika.
- 7). Sědahan hěngėngan miwah sapanunggilan ipun tan kalugra masěha ring Pura Kahyangan sinalih tunggal. Yan wěntěn mamurug, yogya dandha gung artha manut paswara saha ngawangdėyang masěha.
- 8). Tan akalugra ngawěntěnanng kaklěcan, jajuděn, ring utama mandhala. Madhya mandalaning Pura Kahyangan, yan wěntěn mamurug sang ngėlaksanayang katur ring sang amawa rat, tur jějuděn punika kawangdėyang.
- 9). Tan kalugra makta salwiring saně kasinggah tan suci ka jroning Pura Kahyangan. Yan wěntěn mamurug, yogya sang mamurug marisuddha pura ika.
- 10). Sang sapsira hugi rikalaning makěmit ring Pura Kahyangan, yan měrēm, tan kalugra madukan lanang istri, sajaba anak saně kapiněh kari alit, durung rumaja putra, yan mamurug kěni dandha manut pangargan bėras 10 kilogram, tur mrayascita pura punika.
- 11). Pamakşan sowing-sowang Pura Kahyangan sawawěngkoning Dėsa Tabola, kalugra madrwuě sukrěta ndiri-ndiri, nanghing tan dados singsal ring Pasukrėtan Dėsa Tabola.
- 12). Pura Kahyangan tan wěnanng anggěn sajaba ngalaksanayang upacara agama Hindu. Yan wěntěn macihna mamurug sang malaksana kawangdėyang, tur pakardinya kapucěh, saha sang ngalugrain kadandha manut pangargan beras 10 kilogram, mawěwěh ngawěntěnanng upacara panyangaskara.

## **Palet 2**

### **Laluputan**

#### **Paos 28**

- 1). Luput piturunan punika matěgěs tan kěni piturunan salwir ri tatkāla Dėsa Tabola ngangkat sarāja kāryya maprabėya saking piturunan krama dėsa. Asapunika talěr ring tatkāla ngaci-aci salwirě saně dados hěmponan krama Dėsa Tabola maka sarěng sami.
- 2). Krama Dėsa Tabola saně luputn pituranan luwirě :
  - Ha. Prakangěn Dėsa Tabola.
  - Na. Sěkěha Dėsa Sasabu.
  - Ca. Perbekel utawi Kepala Dėsa. Kliang pamusungan, Langlang dėsa
  - Ra. Pěkasėh, Kliyang Subak.
  - Ka. Kliang-kliang bañjar papatusan.

- Ta Ida Brahmana ( Sulinggih, Walaka ) sané wéd kalih jénék malinggih ring wawèngkon Désa Tabola
- Sa Sang sapsira hugi sané kapinéh antuk désa patut ndandang polih laluputan manut paswara

#### Paos 29

- 1). Sang sapsira hugi krama désa sané kahanan cuntaka. tan wénang ngaranjing ka Pura Kahyangan. ka pañucian kāla ning ģuci gėning. minakadi gėnah salwiring gėnah sané kinucap suci pingit. Tan wénang ngaryyanin saji salwiring saji sané jaga pacang katur ka Sanggar. sakadi suci gėning. minakadi bantėn salwiripun sané jagi katur ka pura. miwah sané katur ring pitra pindha. Sajawaning bantėn sané pacang katur ka Prajapayi. Dalėm panguluning sėtra. dados kakryyanin ring umah sang cuntaka kėlaning mangupakāra śawa.
- 2). Lwir sané kinucap cuntaka :
- Ha. Anak istri kėlanaing ngraja-swala. cuntakanė. saking ngawit ngrajaswala. kantos ģat. macihna sampun malukat
- Na. Sang ngantėn lanang istri. suwėnė cuntaka. ngawit saking rahina pangantėnanė. wyadin rahina mėrangkatė. saha sėmayut prayaścita. malukat matirtha.
- Ca. Rāma rėna cuntaka sangkaning madruwė oka. Sané lanang cuntaka suwėnė saking mbas alit kantos kėpus odėl ģanė. Raris malukat. Sané istri pinaka rėna . cuntaka pėtang daśa kalih rahina saking mbas rarėnė.
- 3). Cuntaka malarapan antuk kasėdayan. kapatiyan :
- Ha. Yan sang ngarėpin. minakadi sang magėnah sajroning karang pomahan sang sėda. suwėnė cuntaka. saking wawu sėda kantos puput panglėmėk kėryyanė. mawanėng malih tigang dina. Punapikė mapėndėm. luwih yan atitiwa. Macihnayang punah cuntakanė antuk marėrėbu. malukat.
- Na. Yan sang polih niģjo. ngarap śawa. nggamėl saha ngarėmbat sahėtėh-ėtėh upakāra pula-palining śawa. cuntaka tigang dina. punah cuntaka mahcinanyang antuk malukat
- Ca. Yan sang maģjing mijil ring umah sang ngarakśa śawa. sasuwėn śawa wiyadin layonė karakśa. patėh cuntakanė kadi sang ngaėpin śawa ikā. lėwih yan tungil siddhikāra. patėh cuntakanė kadi sang ngarėpin śawa ikā

- Ra. Yan sang mañjing mijil ring umah sang ngarakša śawa. wiyadin layon sangkaning aniñjo. tan kahanan cuntaka waluya mapas sang makta śawa ring margi agung.
- Ka. Yan sang polih ñembah śawa. mangan paridan śawa. punika talěr kabawos cuntaka. Suwènè kantos sasampun malukat.
- 4). Cuntaka sangkaning malakṣaṇmamitra ngalang. Suwènè cuntaka. salaminè mamitra ngalang.
- 5) Anak wētu sangkaning smara dudu ( tan pawidhi widhana ). babiñjat. punika talěr cuntaka. Suwènè cuntaka. salaminè durung wéntèn mēras. wiyadin nuduk ngangkēnin piyanak. wyadin nganggèn dadaman.
- 6) Cuntaka sangkaning macihna madruwé pañungkan sané tan dados waras salaminè. kadi angganing hila. buduh. ngawijilang rēgēd saking silit. bhaga. purus. tan hēnap mamrēs. brung borok tahunan mabañēh. miwah salwir punika . Suwènè cuntaka. salaminè tan waras.
- 7). Cuntaka sangkaning cēdangga sané kabakta saking wawu mbas saking garbhawaśaning ibu. Punika tan kawēnang napak palēmahan pañuciyān gēnah ñuci gēning.
- 8). Yan wéntèn sinalih tunggal sang cuntaka ngarakša śawa wiyadin layon mamanah utawi mapakayun ngarawuhin karyya hayu atma wēdhana. minakadi mabhakti ring sang wēnang bhaktinin. dados. nanging tan wēnang nggarap ngarēmbat. ñuwun. nggamēl. saupakāran puṣpa lingga.
- 9). Yan wéntèn sinalih tunggal krama dēśa durung tutug cuntaka kadi ucaping harēp. mamurug larangan. yan wéntèn ngatēngahang ka dēśa. prakanggèn dēśa niwakang pamidandha. yogya sang mamurug marisuddha sakabwatan manut panglokika.
- 10) Yan wéntèn sinalih tunggal anak istri. sangkaning tan mēha ngrajaswala sasampun ring pura. wyadin gēnah larangané sawosan. raris kacirēnan. wēnang ya tiwakin dandha tan mēha. yogya marisuddha gēnah punika. katulung antuk pamakṣan pura wiyadin pangēmongè sowing.
- 11). Ri kālaning krama dēśa tēdun makaryya. sang kacuntakan hamung dados ring niṣṭa maṇḍhala ning pura. Yan mamurug wēnang kadanda mrayascita.
- 12). Yan wéntèn sinalih tunggal krama dēśa. kacuntakan antuk ngrakša śawa. wiyadin layon. napkala pagilih pagantosan subak babañjaran ngaci-aci ring sinalih tunggal kayangan dēśa. pacaruwan ring dēśa. sadurung tutug sēngkēr cuntakanya. wēnang tan tēdun māyahan. tan dinosan. Anghing yan wéntèn pasadok sang cuntaka ring prakanggèn ring dēśa. Yan wus tutug

- Cuntakanè, patut narègtèg yan kari ngalantur patèdunané. Mungging piturunan, pawijilan daging salwiripun, yoga katahur narègtèg sasampun tutug sèngkèr punah cuntakanè. Dados kahètang pangarga.
- 13). Yan cuntaka gamya gamana, prakanggèn désa ngaturang sang malaksana ring sang mawa rat, yan sampun wèntèn pamutus, katiwakan danda kadi ring sor puniki, lwirè ; mrayaścita raga, gènah malaksana, kahyangan désa, miwah desa pakraman, Pradè yan katiwakan pamidanda memandal, prasidè désa mrayaścita tur sang malakšana kabawosan saha kicèn pamutus antuk prakanggèn désa manut pamutus pararèm désa.
  - 14). Cuntaka sangkaning macihna salah timpal, cuntaka ragan sang malakšana, miwah désa pagènahanya, tutug cuntakanya yan sampun sang malakšana mrayaścita pañangaskāra salanturnya désa mrayaścita désa.
  - 15). Anak luh bëling tan kapariangkèn, suwènè cuntaka kantos lèkad rarènè saha wèntèn pangupakāra kulawisudha.
  - 16). Yan wèntèn anak macihna ñolong smara, cuntaka patèh ring cuntakan gamia gamana.

### **Palet 3**

#### **Indik Dèwa Yajña**

#### **Paos 30**

- 1). Indik pangaci-aci ring pura-pura kahyangan sané wèntèn ring wawèngkon Dèsa Tabola, kahamongin antuk krama désa, manut hèmponan wiyadin pamakšan . Sajaba sané kahèmpon antuk krama Dèsa Tabola sami, Sowang-sowang madruwè gagaduhan, pinaka hugèr pangaci-aci, miwah babantèn.
- 2). Sané yoga muput haci-aci punika Ida Padandha sané katuhur antuk krama pura sowang, minakadi Pamangku Pura ring pura inucap.
- 3). Yan wèntèn sinalih tunggal Pura durung madruwè Pamangku, utawi Pamangkunè kapihalang, dados nuhur sinalih tunggal pamangku Kahyangan désa, pradé talèr tan mrèsidhayang dados nuhur pamangku sèyosan manūt sima saunggwan-ungguan.
- 4). Pamangku désa punika wantah pamangku Pusèh Tabola, miwah pamangku-pamangku Pura Dalèm sané wèntèn sajroning Dèsa Tabola, kalugra ngantèb bantèn pangodal minakadi sané sawosan ring pura-pura sawawèngkon Dèsa Tabola sané mamuwatang.

- 5) Ri tatkāla dēśa ngawangun kāryya Tabuh Gēntuh. Bhatāra turun kabēh. minakadi kāryya agung sawosan. Dēśa űarad pamangku-pamangku kayangan sakatahē. pacang ngarombo Pamangku Dēśa.

### Paos 31

- 1). Indik pangaci-aci ring Pura Pamrajan. Pahibon. Dadya. punika kahamongin antuk krama dēśa sajroning sēkēha dadya. pamrajan. mānut sima drēstanya sowing. tan singsal ring ucaping śastra Agama Hindu.
- 2). Ri tatkāla Bhatāra turun kabēh. pamrajan. pahibon. dadya. tan sarēng ngalungayang bhatāra. anghing hugi mangda ngiyas pura saha ngadēgang Bhatāra.

### Paos 32

- 1) Bēji punika kahaci-acinin antuk sēkēha bēji. krama dēśa sanē űalud toya punika. Dina pangodal kalih babantēn. manut drēstan sēkēha swang-swang.
- 2) Yan wēntēn sinalih tunggal bēji tan kahaci-acinin. toyan ipun tan yogya anggēn sadhāna makāryya sarwwa suci.

### Paos 33

Aci-aci ring Pura Pusēh Tabola :

- 1). Ha. Patirthayan wiyadi patotoyan agung ring Pura Pusēh Tabola. ri kāla dina Pūrnama Kapat ngamasa-masa. ngararis aci ring Pura Pañatur Pusēh. Kēntēl Gumi.
- Na. Haci-aci kasanggra antuk Dēśa Sasabu. Krama dēśa bañjar Papatusan. sēkēha taruna. sawawēngkon Dēśa Tabola.
- Ca. Lwiring babantēn. manut gagaduhan Pura Pusēh Tabola.
- Ra. Padagingan pacang ngaci-aci. saking upon-upon palabha Pura Pusēh Tabola. kawēwēhin antuk piturunan Krama Dēśa. haturan-haturan krama suka.
- Ka. Yan wēntēn sinalih tunggal pura kahyangan. sinarēngan piodalanē ring patirthan Bhatāra ring Pusēh Tabola. tan kalugra ngarihinin pangodalē.
- 2). Ha. Ngēbēkin. sanunggil Buda Kliwon Dunggulan. ngamasa-masa.
- Na. Sanē űanggra kāryyanē. sēkēha Dēśa Sasabu.
- Ca. Padagingan pacang ngēbēkin. saking palabhan Pusēh Tabola. miwah haturan-haturan.



- Ra. Ri kála ngěběkin ring Pusěh Tabola. Bhatāra ring Pura Gunung Sari. Bhatāra ring Panti Pusěh Kikiyan. Pura Dalěm Cěpik tědun ka Pusěh. kahiring antuk pamaksan pura ikā.
- 3). Ha. Masěgěh. ri kālanning dina Kajěng Kliwon śāsih Kapitu ngamasa-masa.  
Na. Kasanggra antuk Krama Bañjar manut pagilih.  
Ca. Padagingan pacang masěgěh. nganggén piolih-olih palabhan Pura Pusěh Tabola. miwah haturan-haturan.
- 4). Ngayu-hayu. kála dina .....Śāsih ..... Kasanggra antuk Krama Subak Tabola. daging pinaka praběya saking piturunan carik Subak Tabola.
- 5). Pangaci-aci ring Mlanting. kála dina Buda Wagé Kulawu. ngamasa-masa. kasanggra antuk krama děśa sami mānut pagilih. padagingan saking piolih-olih Pasar Děśa Siděměn.
- 6). Bhatāra turun Kaběh. ri tatkāla děśa atabuh gěntuh. napkala Tilěm Kasanga ngadaśa maş.
- 7). Bhatāra ring Basakih turun kaběh. marěřėpan ring Pusěh Tabola. Karyyané kasanggra antuk krama Děśa Tabola sami. sajroning Děśa Tabola.
- 8). Pasěgěh tunggil Kajěng Kliwon. Purnama Tilěm. kasanggra antuk pamangku swang-swang. Padagingan saking palabhan Bhatāra ring Pusěh Tabola. Kahantěbang antuk pamangku sowing.
- 9). Sané kalugra muput salwiring haci-aci ring Pusěh Tabola. Ida Padandha sané katuhur antuk Děśa. tur kasanggra antuk Pamangku Pusěh Tabola.
- 10). Ri kála kabrěběhan jagatě. kagringan. katiběn pañca bhaya. pinganan tan mrěsidhayang ngaturang haci kadi patutě. yogya prakanggén děśa miwah pamangku. maka cihna tan pėgat haci-aciné. Ri wus mawali děgděg jagatě. bhatāra turun kaběh. masasirih. makakobok k sagara giri.
- 11). Yan ri tatkāla mamahayu. ngayum papayon. ring pura-pura kahyangan. pinganan tan puput kála dinaning piodalan. pangaciné wěňang rangkadang. nanghing padatěngan. pacanangan. tan dados pėgatang. Ri wus puput masasapuh salwiré. malih mawali kadi kuna.

#### **Paos 34**

- 1). Ring pura-pura kahyangan. kahamongin antuk pangěmpon manut drěstan pura hinucap.

Paos 35

- 1). Pidabdab ngadegang pamangku :  
Ha Ngambil saking sasērod Santana wiyadin katurunan.  
Na Saking pamuwus pasēmburan. wiadin ñañjan kantos ping tiga.  
Ca Sangkaning kajujuh saha kabriyukin antuk krama Désa Tabola.
- 2). Sang sapisira hugi pinaka jan banggul pamangku ring Pusēh Tabola. minakadi ring Pura kahyangan sajroning Désa Tabola. mangda pagēh ngamēl kalih ngalakṣanayang śaṣanan Pamangku.
- 3). Sang sapisira hugi krama désa sangkaning sasrod. sangkaning kasēnēngan antuk Bhatāra. polih pamuwus ring sasēmburan. minakadi kajujuh kabriyukin antuk krama désa. pacang kaanggēn . yan kari alaki rabi yogya lanang istri mawintēn.
- 4). Sang kasudi pacang kanggēn Pamangku. patut mawintēn ring Pura gēnahe dados jan banggul. munggwing prabēya kasandangin antuk pamaksan pura sowang-sowang . yan ring Dalēm antuk krama désa Dalēm. yan ring désa antuk krama dēsane sami.
- 5). Pamangku patut madruwé hamongan pura sowang-sowang. yan tan madruwé hamongan pura. prasiddha tan kalugra ngantēbang ring pura-pura salwiré.
- 6). Sinalih tunggal pamangku yan katēkan pati. yogya tiniwakēn. Patut polih patulung prabēya atitiwa. saking krama Pura sané kahamongin. agung alit patulungé nganutin pamutus babawos sajroning pararēman kāla punika. Yan wus tiniwakēn. patut kakaryyanang pangēlad wiyadin papēgatan antuk krama pura hinucap. Punika yan pamangkuné kari rajēg ngamong swadhammaning pamangku kantos antaka.
- 7). Twas-twasan pamangku . mungguh sajroning gagaduhan Pusēh Tabola. minakadi gagduhan pura swang-swang. taler nganutin drēsta kuna
- 8). Pamangku kagēntosin majalaran antuk :  
Ha. Mapinunas mararyyan. saking patut panunasé. nānging tan kari ngalakṣanayang dhrammaning Pamangku. Kawēkas kalaning sēda tan polih patulung prabhēya  
Na. Saking patut pinunasé. majalaran antuk lingsir. sampun tan mampuh sungkan rahat tan kēngin waras. Kajadayang antuk krama pura. wiyadin désa. Kawēkas kālaning sēda tan polih patulung prabhēya atitiwa

**Paos 36**

- 1). Indik Sosot :
  - Ha. Yan wéntěn sinalih tunggal pacang nahur sosot wiyadin punagi. salwiring punagi. gumanti sané patut nganggén paměgat sot. tan dados nahur sot yan tan kālaning dina piodalan Bhatāra. ngadaśa dinayang aci-aci. sang pacang nahur punagi patut sampun masadok ring Kliyang Pamaksan Pura. yan ring Kahyangan Dėśa panahuranė masadok ring Prakanggėn Dėśa. Panahuran punagi ika. kapuput antuk Ida Padandha sasampun bantěn pangodalė.
  - Na. Yan wéntěn sinalih tunggal nahur sasangi pacang ngaturang piodalan hugi mangda pagantosan dina piodalan. Sang nahur punagi. wěnanng nunas kanti patulung karyya ring pamaksan. Sang nahur sasangi ņuksrahang daging cuměk. saprabhėyaning pangodal ring pamaksan pura.
  - Ca. Yan wéntěn sinalih tunggal nahur sasangi maturan swaran tangguran salwiring tatabuhan. sasolahan. minakadi salwir ipun. mungging prabhėya punika sami kaangganin antuk sang masasangi.
- 2). Haturan :

Yan wéntěn sang sapsira hugi ngaturang jinah.. mwanng sarupaning barang . punika sami patut kahanudikayang antuk Prakanggėn Dėśa. Kėliyang Pamakşan Pura Swang-swang mangda kasiddhan mapwara hayu. Haturan punika kaungguhang jroning lėkita.
- 3). Sasarin Canang :

Sasampun puput pangaci-acinė pūja walinė. sasarin canang punika kapupulang saha kawilangin. Kahunadikayang antuk Prakanggėn Dėśa. kėliyang Pura. indik tatiwak kalih pamargin ipun. sangkaning jati nirmala.

**Palėt 4**

**Indik Rėşi Yajña**

**Paos 37**

- 1). Krama Dėśa Tabola. yogya ngawrėdiyang kaprajñanan. kaultaman Sang Hyang Aji. asėwaka nunas pawarah ring sang maraga widagdha prajñan . pingajeng ring sang kasinanggah guru loka.

- 2). Prakanggèn Dèśa. Kliyang-kliyang Bañjar Papatusan. ngutsahayang kawrēdiyan kamuruban kaultaman Sang Hyang Aji. ngawéntēnang pasamuhan-pasamuhan. parēmbugan. pinaka gēnah krama dèśa mamangguhangan pawarah-warahan hayu.
- 3). Kālanning diwasa hayu. wēnang dèśa atirtha yatra. wēnang dèśa ngaturang puniya miwah rēṣi bhojana ring Ida Padandha. Talēr kālanning karyya utama ring Dèśa. salwiring karyya sané kaputus antuk Ida Padandha patut ngaturang puniya. Asapunika talēr ring sang mapitulung patut mawēh dana.
- 4). Sang sapisira hugi krama Dèśa Tabola yan mapakayun pacang mapodgala. talēr mangda wētēn pasadok ring Prakanggèn Dèśa. sajaba palugrahan saking Guru Wiśēṣa.
- 5). Prakanggèn Dèśa Tabola. mamatut pisan . yan krama dèśané mapuniya ring sang prajñan. ring sang widagdha. ring sang satata ngarajēgang dharma. pingajēng ring Ida Padandha pasūryya ñané swang-swang.

## Palēt 5

### Indik Pitra Yadnya

#### Paos 38

- 1). Pamargi ngupakāra sawa. hugi manut linging sāstra Agama Hindu. Wētēn akudang-kudang soroh. sakadi hinucap ring sor puniki :  
Ha. Mapēndhēm ring prathiwi.  
Na. Makingsan ring gnhi.  
Ca. Atiwa-tiwa. palēbon. ngabèn.  
ra. Yan raré durung makupak huntu. wēnang nganggé pangēntas bangbang tan wēnang tiniwakèn.  
Ka. Yan raré durung kēpus hoděl. pamali ngaran . pēndhēm juga tan hana pangupakaranya.....( hamung gantēn adēm paicehan Ida Padandha ).
- 2). Sang sapsira hugi krama dèśa Tabola. tan kawaśa makta sawa ka dèśa pakraman. yan śawa ika sampun kēni pangupakāra śawa. Yan wētēn mamurug. yogya katiwakan dandha . mrayaścita marisuddha dèśa.
- 3) Salwiring upacāra atiwa-tiwa. palēbon. ngabèn. ring sētra ugi kawēnanganya. tan wēnang ring dèśa pakraman. Sajaba layon Ida Padandha. Yan wētēn mamurug. wēnang dandha marisuddha dèśa Krama Dèśa sang atulung. dandha artha ..... kang sadiri.

- 4) Yan wentèn krama désa ngurung sawa macamana mabrédih, kawénanganya tan kalugra lintanangan ring tigang sasih ngawit saking dina sédané. Yogya mūrnama Tilēm. Padgatakāla kālaning ngurung sawa, ring Désa Tabola kawangunang karya agung. Iwiré : matabuh gentuh. Bhatāra turun kabeh. Bhatāra ring Basakih lunga ka Pusēh Tabola, yogya tumpang saluné tédunang saking baléné, gēnahang ring natah umahé.
- 5) Tan wēnang nēkēh sawa yan tan macamana, mabrēsih, lintangan ring roras dina, ngawit saking dinané séda. Yan wentèn mamurug, dandha gung artha ..... Saha marayaścita désa
- 6) Sang sapasira hugi krama désa Tabola, tan wēnang atitiwa, ri kāla pangaci-aci désa, Iwiré : Patirthān patotoyan agung ring Pusēh Tabola, Bhatāra Turun Kabēh, Tabuh Gēntuh, Bhatāra ring Basakih lungha ka Pusēh Tabola, minakadi karya sawosan yan kantos nuci gening :
- Ha. Yan patirthayan ring Pusēh Tabola, saking nigang dinayang aci, kantos Bhatāra puput masinēb.
- Na. Yan matabuh Gēntuh, Bhatāra turun kabēh, minakadi salwiring karya sané nuci gening, saking ngawit nuci ngantos Bhatāra puput masinēb.
- Ca. Yan kālaning Bhatāra ring Basakih lunga ka Pusēh Tabola, saking nigang dinayang Bhatāra tédun ka Pusēh, kantos Ida Bhatāra mawali saha sampun rawuh ring Basakih.
- Yan wentèn mamurug dandha mrayaścita désa, minakadi krama désa sané matulung dandha gung artha ..... kang sadiri.
- 7) Yan wentèn sinalih tunggal krama désa mēndhēm sawa kālaning dina malarang kadi inucap ring ajeng, kawaśa, nānghing hugi masawén, durung masusunan bintak, laku kingsan ngaran.
- 8) Yan makingsan ring ghni, sawa ginēsēng hasti hinañut, manut krama Munggwing déwaśa sa sor ipun déwśané dados marginin mēndhēm sawa
- 9) Indik Padéwasan :
- Ha. Padéwasan mēndhēm ring prathiwi, makingsan ring ghni, wēnang katiwakang antuk kliyang Bañjar Papatusan, wiyadin Kliyang Dalēm sowing-sowang
- Na. Padéwasan atiwa-tiwa, katiwakang antuk Ida Padandha sané pacang muput, yogya kapatut antuk Prakanggen Désa Tabola
- Ca. Indik larangan ngupakāra sawa ( sajaba ngunggahang ka tumpang salu ) sawawéngkon Désa Tabola Iwiré :
- Buda Wage, Saniścara Kliwon, Anggara Kliwon, Radite Umanis, Sukra Pwon, Saniścara Wage, Radite Kliwon, ika sēmut sēdulur, Śukra Kliwon, Saniścara Umanis, Radite

panglong ping 15. Tanggal panglong ping 14. mwah Tanggal panglong 1: Wrěhaspati. nuju tanggal. panglong 1. 8. Yan ring Wrěhaspati ingkěl wong. Yan wěntěn sinalih tunggal mamurug. wěnanng dandha gung artha ..... Saha mrayascita dėsá.

Ra. Tan wěnanng ngagah ngulung. tęgēs ipun. sajroning sėtra tunggal. tan dados mrěsihin śawa. nuju dina pangutangan. yan ring sėtra punika wěntěn ngalaksanayang pangabėnan. Yan wěntěn mamurug dandha gung artha.....

Ka. Tan wěnanng ngutang ngirim. tęgēs ipun. sajroning sėtra tunggal. yan wěntěn ngirim. tan dados sanė sawosan mēndhēm śawa. minakadi atiwa-tiwa. ngabėn. ring dina punika. Yan wěntěn mamurug. yogya dandha gung artha .....

- 10). Yan wěntěn śawa tan kaparihankěn ring wawěngkon Dėsá Tabola. ingaranan bėdagan dėsá. yogya prakanggěn dėsá ngudhang krama dėsá mēndhēm ring sėtra pangilang-ngilanganė. sinalih tunggal sanė wěntěn ring wawěngkon Dėsá Tabola. sasampun polih lugraha saking sang amawa rat.
- 11). Yan wěntěn śawa sangkaning salah pati. angulah pati. mati kapangawan. minakadi salwir ipun. Dėsá tan ngalarangin yan śawa punika tiniwakěn pramangkė. sara lėdang sang madruwė . minakadi Ida Padandha sanė pacang muput.
- 12). Yan wěntěn sinalih tunggal śawa. gėnahė sėda wiyadin padēm. sajaba ring karang pomahan. lwirė : ring tęgəl. ring carik. pura. pasar. bañjar. sėkolah. minakadi gėnah sawosan dudu karang pomahan. yoyga sang madruwė wirangė mrayascita gėnah punika. Yan śawa tan kaparihankėnan. gėnah punika patut kaparisuddha kaprayascita antuk sang madruwė hėmponan.

### Indik Angatma Wėdana

#### Paos 39

- 1). Sang sapsira hugi krama Dėsá Tabola. yan kėlaning angatma wėdhana. lwirė : ngaroras. patilėman. baligya. tan wěnanng ngawangunang pėtak. payajñan. ring palėmahan Pura Kahyangan Dėsá. Pamakşn. utama mandhala

- 3) Sang sapisira hugi wus ngawangun karyya angatma wédhana. yoga karang yajña ika kapralina. sakasép ipun pětang daśa kalih dina saking dina karyyanè.

### **Palèt 6**

#### **Manusa Yajña**

**Paos 40**

- 1). Sang sapisira hugi krama dèśa Tabola. ngawangunang salwirè upacāra. mānuṣa yajñ. tan wěnanḡ magěnah ring wawidangan palēmahan pura kahyangan pañiwiayan dèśa. pamakṣan. ring niṣṡa. Madhya. uttama mandhala. Yan wěntěn sinalih tunggal mamurug , wěnanḡ dandha gung artha .....saha mrayaścita marisuddha pura ikā.
- 2). Sanè kalugra mawintěn magěnah ring pura sinalih tunggal. sang sapsira hugi sanè pacang kahaděgang pamangku pinaka jan banggul Bhatāra ring Pura Kahyangan inucap.

### **Palèt 7**

#### **Indik Bhuta Yajña**

**Paos 41**

- 1). Sajroning Dèśa Tabola. pacaruwan manut unggwan. kalih sor singgih. Iwirè:
- Ha. Pacarun Dèśa sadākāla :
- Mañca Śatha : ngamaṣa-maṣa kāla Tilěming Kasanga.
  - Mañca Sānak : ngalimang maṣa. kāla tilěming kasangan.
  - Tabuh Gěntuh : Ngadaśa maṣa. kāla tilěming kasanga. nuju Rah windu.
- Na.. Pacaru Dèśa padgatakāla. ri kāla jagatè kabrěbėhan. kagringan. kadurmanggalan. katbèn pañca-bhaya. miwah sanè sawosan.
- Ca. Agung alit caru. manut unggwan acaru. babwatan pacarwan. kalih niṣṡa. Madhya uttamaning caru.
- 2). Pacaruwan ring pura-pura kahyangan. Pamakṣan. Pamrajan. Dadya. salwirè , manut drěsta minakadi awig-awig. gagadhuan pura swang-swang.
- 3). Pacaruwan ring Pura Dalēm sanè wěntěn sajroning Dèśa Tabola. manut drěsta minakadi awig-awig gagadhuan pura Dalēm ikā swang-swang.

- 4) Pacaruwan ring bañjar-bañjar papatusan sajroning Désa Tabola. ri kála Kajēng Kliwon nuju sasih Karo. ngararis pacaruwan ring karang pomahan sowing-sowang.
- 5) Yan wéntēn sinalih tunggal Pura Kahyangan. Pura Pamakṣan. Pura Dalēm rēnēng pacaruné kantos tigang plabuh. wēnang prakanggén Désa Tabola mamawosin. Yan wus puput babawos. yogya maguru piduka ngawit masasapuh mangda kasiddhan ngaturang pangaci-aci.
- 6) Yan wéntēn sinalih tunggal bañjar papatusan. rēnēng pacaruné kantos tigang plabuh. yogya Kliyang Dalēm sané ngawiwēnangang mamawosin . Yan tan puput babawosé. yogya katur ka Désa. . prakanggén Désa mamawosin tur ngicén pamutus.
- 7) Pacaron kālaning Tilēm Kasanga. ring karang pomahan sowing-sowang. kalanturang antuk Catūr-Brata pañepiyan.

## SAT SARGAH

### SUKRĒTA TATA PAWONGAN

#### Palēt 1

#### Indik Rangkat

#### Paos 42

- 1). Indik rangkat punika mānut Désa Kāla Patra. mwang sima drēsta sane kapatutang tur katinūtin antuk krama désa swang-swang
- 2). Sajroning Désa Tabola. indik rangkat ikā. yan sampun mawidhi widhana niṣṭa. Madhya. utama. rangkat punika kasinaggah puput palikrama.
- 3). Yan wéntēn anak istri sinalih tunggal. karangkatang antuk sang sapsira hugi. lwih antuk anak saking dūra désa. yan kantos tigang dina saking dina hicalé tan wéntēn pasadok pajati. yogya sang maduwé wirangé nunas kanti ring prakanggén Désa Tabola. mangda ngamargiyang sasrēpan. Yan sampun sinah gēnahnya. ngararis ngamarggiang panēgdēg.
- 4). Sang sapsira hugi krama désa Tabola. yan karawuhan tamyu praya masinutan malarapan antuk ngarorod. hugi mangda masadok mihuningang ring Prakanggén Désa yogya maritētēs. Yan sangkaning tan patut pamarggin rangkatnya prakanggén désa laju ģukṣrahang ring Guru Wiśeṣa. Yan wéntēn mamurug. yogya sang mamurug dandha gung artha



- 5) Yan wentén sinalih tunggal Krama Désa Tabola. ngamét anak istri antuk mlégandang maméndét. marikosa. miwah salwiripun. tan sangkaning sami dêmén. tan yogya pinuput pawidhi widhananya sadurung wentén pamutus saking guru Wisesha.
- 6) Yan wentén sinalih tunggal saking dūra désa. pacang muput rangkat ka wawéngkon Désa Tabola. sang madruwé wiring luh yogya nunas pasakji ring Prakanggan Désa Tabola. sinalih tunggal mangda wentén ngarawuhang
- 7) Yan wentén sinalih tunggal ngamét anak istri pinaka rabi tan manut sima drēsta minakadi śastra agama. yogya katur ring sang mawa rāt mangda mamawosin.

## Palēt 2

### Indik Bēlas Makurēn / Āpiyan

#### Paos 43

- 1). Sané kabawos āpiyan. pinaka sang palas marabi. palas makurēnan. sané sampun katiwakan pamutus antuk guru Wisesha.
- 2) Yan wentén sinalih tunggal krama désa ngrangkatang sapiyan sadurung tigang śasih utawi 105 dina rahina saking dina palasé. yogya sangk ngrakatang sapiyan kēni dandha pakérang gung artha .....
- 3). Yan wentén anak istri wit saking wawéngkon Désa Tabola. āpiyan ring dūra désa. mawali ka désanya. yogya sang madruwé wiring mrayaścita marisuddha anaké luh punika. Yan tan kaparisuddha antuk wirangnya. patut marisuddha raga. mangda tan kasinanggah cuntaka

## Palēt 3

### Indik Balu

#### Paos 44

- 1) Sané kabawos balu. anak istri katinggal séda antuk rabiné. Yan anak lanang séda rabiné. wiyadin katinggalin āpiyan talér kawastanin balu.
- 2) Yan wentén sinalih tunggal krama désa lanang balu. wiyadin istri balu. ngawéngku karang pomahan. yogya mapyahan asēte.
- 3) Yan wentén balu lanang ngawéngku karang. maduwe Santana luh sampun hantēs māyahan. yogya māyahan bulangkép.

- 4). Yan wéntěn balu istri maduwè Santana lanang sampun hantēs māyahan. yogya māyahan bulangkĕp.
- 5). Yan wéntěn sinalih tunggal anak istri balu. marangkat. yogya rangkat punika kapuputang antuk wiring lakiné rihin. yan babalon punika kari pagĕh.
- 6). Mungging wawĕnangan babalon luh utawi rangda . ring indik wawarisan minakadi sané sawos-sawosan. nganutin hugĕr-hugĕr sané karajĕgang antuk Guru Wiseṣa.

#### **Palĕt 4**

#### **Indik Santana**

#### **Paos 45**

- 1). Sajroning Désa Tabola. ngarajĕgang pidabdab Santana ka puruṣa. siddhikārs tunggal. papĕrasan. tunggal siddhikāra.
- 2). Sang sapisira hugi sinalih tunggal krama désa Tabola. mĕras Santana. nuduk mantu. makĕdihang utawi ņerhang raga. yogya sangkaning radin. tunggal siddhikāra. tunggal dadya. saha polih palugrahan saking Guru Wiseṣa.
- 3). Indik mĕras Santana. nuduk mantu. ņuksĕrhang raga. sasampun polih palugrahan saking Guru Wiseṣa. yogya kadulurin antuk upacāra manut śāstra Agama Hindu skabwatan swang. sinakṣĕnan dĕning Prakanggĕn Désa Tabola.

#### **Palĕt 8**

#### **Indik Wawarisan**

#### **Paos 46**

- 1). Lwiré sané wĕnang kawarisin :  
Ha. Hamong-hamongan ring désa. ayah-ayahan sahurah-harih.  
Na. Hutang. pihutang sang kawarisin.  
Ca. Sarāja druwé. brana. tĕgal. carik. tatamiyan. sakañcan kasugihan.
- 2). Sané wĕnang ngawarisin :  
Ha. Manut talintih paprĕnahan. adoh tampĕk saking purusa tunggal siddhikāra. tunggal dadya  
Na. Putra dadaman wiyadin putra papĕrasan.  
Ca. Santana saking nuduk mantu.

- Ka. Sangkaning polih pitēmēs sakng sang kawarisin sang madruwé salwir sané dados kawarisang kasaksinin antuk Guru Wiseša. pinih akéh apahtigaan saking padruwén ñané.
- 3). Sang sapisira hugi krama déśa Tabola. tilar saking agama Hindu. tur yogya ngawaris sané kamulan patut kawarisin.
- 4). Ngědum warisan kapatut sasampun puput maabėnang sang ngawarisang brana punika. Sané dados dum. sajaba sané manggė padagingan pangaci-aci minakadi salwiring sané manggė piranti ngalaksanayang upacara agama.

## SAPTAMA SARGAH WICARA LAN PAMIDANDHA

### Palėt 1

#### Indik Wicara

#### Paos 47

- 1). Salwiring wicāra indik pakraman. ring wawidangan Déśa Tabola wėnang rinawosan dėning Prakanggėn Déśa. Yan tan kasiddhan puput. Prakanggėn Déśa ngaturang ring Guru Wiseša. buwat matatimbang.
- 2). Yan wėntėn wicara ring Pamakšn. ring bañjar papatusan. ring subak. ring sėkėha-sėkėha sawosan. yogya kabawosang antuk prakanggėnya sowing. Yan tan kasiddhan puput. wėnang katėngahang ka Déśa. Prakanggėn Déśa yogya mamawosin.
- 3). Yan pamutus wicara sané katiwakang antuk Prakanggėn Déśa Tabola. tan kahiring tan katinutin antuk sang mawicāra. wėnang sang mawicāra nunasang pangrawos ring sang patut mamawosin. inggih punika Guru Wiseša.
- 4). Yan sang mawicāra talěr tan tinut ring pamutus wicara sané katiwakang hinucap ring hajėng. prasiddha sang mawicāra kahėladang saking Déśa kantos puput wicāranya.

Palèt 2

Indik Pamidandha

Paos 48

- 1). Lwiring pamidandha sané wĕnang katiwakang antuk Prakanggĕn Déśa Tabola. Bañjar Papatusan. Subak. Pamakşan Pura. sĕkĕha-sĕkĕha sawawĕngkon Déśa Tabola. sakadi ring sor puniki :  
Ha. Dandha artha.  
Na. Dandha ayah-ayahan.  
Ca. Upasakşi, déwa sakşi, pangrarata, sumpah.  
Ra. Dandha panyangaskara, lwirĕ : mrayaşcita, marisuddha, miwah salwir ipun.  
Ka. Pamidandha sawosan manut palugrahan Guru Wiseşa.
- 2). Patiwak pamidañdha, manut unggwan wicaranĕ swang-swang, lwirĕ :  
Ha. Yan wicĕra ring Déśa Pakraman Tabola, yogya kapidañdha antuk Déśa. Dadañdhan mantuk ka Déśa.  
Na. Yan wicĕra ring bañjar papatusan, katiwakin pamidañdha ring bañjar ika, dadañdhan mantuk ka bañjar.  
Ca. Yan wicĕra ring Krama Pura Dalĕm, krama pamakşan pura kahyangan sawosan, katiwakin pamidañdha antuk prakanggĕ pura ikĕ. Dadañdhan mantuk ring pamakşan hinucap.
- 3). Agung alit dadañdhan, manut panglokikan agung alit kasisipanĕ, sanĕ mungguh ring awig-awig gagaduhan swang-swang, minakadi paswara pinaka pamutus pasamuhan.

ASTAMA SARGAH

NGUWAH-NGUWUHIN AWIG-AWIG

Paos 49

- 1). Sanĕ wĕnang uwahin, inggih punika, pasukrĕtan, paswara, pamutus, pararĕman wiyadin pamutus pasamuhan miwah sanĕ sawosan.
- 2). Sanĕ wĕnang uwuhin, inggih punika, pasukrĕtan, paswara, pamutus, pararĕman wiyadin pamutus pasamuhan miwah sanĕ sawosan.
- 3). Indik nguwahin kalih nguwuhin pasukrĕtan, paswara, pamutus pararĕman wiyadin pamutus pasamuhan miwah sanĕ sawosan, manut tata kramaning pasamuhan.
- 4). Indik nguwahin kalih nguwuhin Awig-awig, manut tata kramaning pasamuhan talĕr saking palugrahan Sang Amawa Bhumi.

## NAWAMA SARGAH

### PAMUPUT

Paos 50

- 1). Awig-awig puniki mawasta "AWIG-AWIG DĒŚA PAKRAMAN TABOLA"
- 2). Awig-awig puniki pinaka bantang sahananing awig-awig, paswara, pasukrĕtan, miwah salwir ipun, sanĕ manggĕ ring swang-swang bañjar, Pura Kahyangan, Pamakşan, Subak, Sĕkĕha-sĕkĕha, sanĕ wĕntĕn sajroning Dĕśa Pakraman Tabola.
- 3). Bañjar, Pura Dalĕm, Pura Kahyangan, Subak, Sĕkĕha-sĕkĕha sanĕ wĕntĕn sajroning Dĕśa Pakraman Tabola, wĕnang ngawangunang Awig-awig, paswara, gagadhuan swang-swang, nānging daging ipun tan yoga tungkas ring Awig-awig Dĕśa Pakraman Tabola.
- 4). Salwiring sanĕ durung kinucap ring Awig-awig puniki, kaungguhang sajroning paswara, pamutus pasamuhan Dĕśa Tabola.
- 5). Drĕsta kuna sanĕ kari dados anggĕ, yan tan tungkas ring daging Awig-awig Dĕśa Tabola, manut kojaring śastra Agama Hindu, hanĭt ring ugĕr-ugĕr nagara, saha kaputusang sajroning paruman Dĕśa Pakraman Tabola.
- 6). Awig-awig Dĕśa Pakraman Tabola puniki, pawangun Krama Dĕśa tabola, kapaştika manĭt Upacāra Agama Hindu, kāla dina .....ring Pusĕh Tabola  
Kapuput antuk Ida Padandha .....
- 7). Awig-awig puniki kalinggatanganin antuk Prakanggĕn Dĕśa, Pingajĕng Dĕśa, minakadi Kĕliyang Dĕśa, Pamadĕn Kĕliyang Dĕśa, Panyarikan, saha kasarĕngin antuk Kĕliyang-kĕliyang bañjar papatusan, tur kasaksinin antuk Kepala Dĕśa, sawawidangan Dĕśa Tabola, Camat Sidĕmĕn, kakukuhang antuk Bupati Karangasĕm.
- 8). Awig-awig puniki kalakşanayang ngawit dina  
.....kantos salantur ipun.